

सिरि उसहदेव सामिस्स णमो । सिरि गोडी - जिराउला - सब्बोदयपासणाहाणं णमो । नमोऽत्थुणं समणस्स भगवओ महइ महावीर वद्धमाण सामिस्स । सिरि गोयम-सोहम्माइ सब्ब गणहराणं णमो । सिरि सुगुरु-देवाणं णमो । **॥ श्रीनिरयावलिकोपाङ्गम् ॥** तेणं कालेणं तेणं समणं रायगिहे नामं णयरे होत्था रिद्धत्थिमियसमिद्धे० गुणसिलए चेइए वन्नओ, असोगवरपायवे पुढवीसिलापट्टए । १। तेणं कालेणं० समणस्स भगवओ महावीरस्स अंतेवासी अज्जसुहम्मे नामं अणगारे जातिसंपन्ने जहा केसी पंचहिं अणगारसएहिं सद्धिं संपरिवुडे पुव्वाणुपुव्विं चरमाणे जेणेव रायगिहे नगरे जाव अहापडिरूवं उग्गहं ओगिण्हित्ता संजमेणं जाव विहरति, परिसा निग्गया, धम्मो कहिओ, परिसा पडिगया । २। तेणं कालेणं० अज्जसुहम्मस्स अणगारस्स अंतेवासी जंबू णामं अणगारे समचउरंसंठाणसंठिए जाव संखित्तविउलतेयलेस्से अज्जसुहम्मस्स अणगारस्स अदूरसामंते उड्डंजाणू जाव विहरति । ३। तए णं से भगवं जंबू जातसद्धे जाव पज्जुवासमाणे एवं वयासी-उवंगाणं भंते ! समणेणं जाव संपत्तेणं के अट्टे पण्णत्ते ?, एवं खलु जंबू ! समणेणं भगवया जाव संपत्तेणं एवं उवंगाणं पंच वग्गा पं० तं० - निरयावलियाओ कप्पवडिंसियाओ पुप्फिथाओ पुप्फचूलियाओ वण्हिदसाओ, जइ णं भंते ! समणेणं जाव संपत्तेणं उवंगाणं पंच वग्गा पं० तं० - निरयावलियाओ जाव वण्हिदसाओ पढमस्स णं भंते ! वग्गस्स उवंगाणं निरयावलियाणं समणेणं भगवया जाव संपत्तेणं कइ अज्झयणा पं० ?, एवं खलु जंबू ! समणेणं जाव संपत्तेणं उवंगाणं पढमस्स वग्गस्स निरयावलियाणं दस अज्झयणा पं० तं० - काले सुकाले महाकाले कण्हे सुकण्हे तहा महाकण्हे वीरकण्हे य बोद्धव्वे रामकण्हे तहेव य पिउसेणकण्हे नवमे दसमे महासेणकण्हे उ । ४। जइ णं भंते ! समणेणं जाव संपत्तेणं उवंगाणं पढमस्स वग्गस्स निरयावलियाणं दस अज्झयणा पं० पढमस्स णं भंते ! अज्झयणस्स निरयावलियाणं समणेणं जाव संपत्तेणं के अट्टे पं० ?, एवं खलु जंबू ! तेणं कालेणं० इहेव जंबुद्धीवे द्वीवे भारहे वासे चंपा नामं नयरी होत्था रिद्ध०, पुन्नभदे चेइए, तत्थ णं चंपाए नयरीए सेणियस्स रत्तो पुत्ते चेल्लणाए देवीए अत्तए कूणिए नामं राया होत्था महता०, तस्स कूणियस्स रत्तो पउमावई नामं देवी होत्था सोमाला जाव विहरइ, तत्थ णं चंपाए नयरीए सेणियस्स रत्तो भज्जा कूणियस्स रत्तो चुल्लमाउया काली नामं देवी होत्था सोमाला जाव सुरूवा, तीसे णं कालीए देवीए पुत्ते काले नामं कुमारे होत्था सोमाल जाव सुरूवे । ५। तते णं से काले कुमारे अन्नया कयाई तीहिं दंतिसहस्सेहिं तीहिं रहसहस्सेहिं तीहिं आससहस्सेहिं तीहिं मणुयकोडीहिं गरुलवूहे एक्कारसमेणं खंडेणं कूणिएणं रत्ता सद्धिं रहमुसलं संगामं ओयाए । ६। ततेणं तीसे कालीए देवीए अन्नदा कदाई कुडुंबजागरियं जागरमाणीए अयमेयारूवे अज्झत्थिए जाव समुप्पज्जित्था - एवं खलु ममं पुत्ते कालकुमारे तीहिं दंतिसहस्सेहिं जाव ओयाए, से मन्ने किं जइस्सति ? नो जइस्सति ? जीविस्सति ? णो जीविस्सति ? पराजिणिस्सइ ? णो पराजिणिस्सइ ? कालं णं कुमारं अहं जीवमाणं पासिज्जा ? ओहयमण जाव झियाइ, तेणं कालेणं० समणे भगवं महावीरे समोसरिते, परिसा निग्गया, ततेणं तीसे कालीए इमीसे कहाए लद्धट्टाए समाणीए अयमेतारूवे अज्झत्थिए जाव समुप्पज्जित्था - एवं खलु समणे भगवं० पुव्वाणुपुव्विं० इहमागते जाव विहरति तं महाफलं खलु तहारूवाणं जाव विउलस्स अट्टस्स गहणताए तं गच्छामि णं समणं जाव पज्जुवासामि इमं च णं एयारूवं वागरणं पुच्छिस्सामित्तिकट्टु एवं संपेहेइ ता कोडुंबियपुरिसे सद्दावेति ता एवं वद्दसी-खिप्पामेव भो देवाणुप्पिया ! धम्मियं जाणप्पवरं जुत्तमेव उवट्टवेह ता जाव पच्चप्पिणंति, ततेणं सा काली देवी ण्हाया कयबलिकम्मा जाव अप्पमहग्घाभरणालंकियसरीरा बहूहिं खुज्जाहिं जाव महत्तरगविंदपरिक्खित्ता अंतेउराओ निग्गच्छइ ता जेणेव बाहिरिया उवट्टाणसाला जेणेव धम्मिए जाणप्पवरे तेणेव उवागच्छइ धम्मियं जाणप्पवरं दुरुहति ता नियगपरियालसंपरिवुडा चंपं नयरीं मज्झिमज्झेणं निग्गच्छति जेणेव पुण्णभदे चेइए तेणेव उवागच्छइ ता छत्तादीए जाव धम्मियं जाणप्पवरं ठवेति ता धम्मियाओ जाणप्पवराओ पच्चोरुहति ता बहूहिं जाव खुज्जाहिं जाव विंदपरिक्खित्ता जेणेव समणे भगवं महावीरे तेणेव उवागच्छति ता समणं भगवं० तिक्खुत्तो वंदति० ठिया चेव सपरिवारा सुस्सूसमाणा नमंसमाणा अभिमुहा

सौजन्य :- मातुश्री शाकरबेन दामशु गंगर पौत्रो विराग - तेजस - ऋतु मेराठ (६२४)

विणएणं पंजलिउडा पज्जुवासति, तते णं समणे भगवं जाव कालीए देवीए तीसे य महतिमहालियाए धम्मकहा भाणियव्वा जाव समणोवासए वा समणोवासिया वा विहरमाणा आणाए आराहए भवति, ततेणं सा काली देवी समणस्स भगवओ० अंतियं धम्मं सोच्चा निसम्म जाव हियया समणं भगवं० तिक्खुत्तो जाव एवं वदासी- एवं खलु भंते ! मम पुत्ते काले कुमारे तीहिं दंतिसहस्सेहिं जाव रहमुसलसंगामं ओयाते से णं भंते ! किं जइस्सति ? नो जइस्सति ? जाव कालं कुमारं अहं जीवमाणं पासिज्जा ?, कालीति समणे भगवं० कालिं देविं एवं वयासी- एवं खलु काली ! तव पुत्ते काले कुमारे तीहिं दंतिसहस्सेहिं जाव कूणिणं रत्ता सद्धिं रहमुसलं संगामं संगामेमाणे हयमहियपवरवीरघातितनिवडितचिंधज्झयपडागं निरालोयातो दिसातो करेमाणे चेडगस्स रत्तो सपक्खिं सपडिदिसिं रहेणं पडिरहं हव्वमागते, ततेणं से चेडए राया कालं कुमारं एज्जमाणं पासति ता आसुरुत्ते जाव मिसिमिसेमाणे धणुं परामुसति ता उसुं परामुसइ ता वइसाहं ठाणं ठाति ता आययकण्णायतं उसुं करेमाणे कालं कुमारं एगाहच्चं कूडाहच्चं जीवियाओ ववरोवेति, तं कालगते णं काली ! काले कुमारे, नो चेव णं तुमं कालं कुमारं जीवमाणं पासिहिसि, तते णं सा काली देवी समणस्स भगवओ० अंतियं एयमट्ठं सोच्चा निसम्म महया पुत्तसोएणं अप्फुत्ता समाणी परसुनियत्ताविव चंपगलता धसत्ति धरणीतलंसि सव्वंगेहिं संनिवडिया, ततेणं सा काली देवी मुहुत्तरेणं आसत्था विसत्था समाणी उट्ठाए उट्ठेति ता समणं भगवं० वंदइ नमंसइ ता एवं वयासी- एवमेयं भंते ! तहमेयं भंते ! अवितहमेयं भंते ! असंदिद्धमेयं भंते ! सच्चे णं एसमट्ठे से जहेतं तुब्भे वदहत्तिकट्ठु समणं भगवं० वंदइ नमंसइ ता तमेव धम्मियं जाणप्पवरं दुरूहति ता जामेव दिसं पाउब्भूया तामेव दिसं पडिगता ।७। भंते त्ति भगवं गोयमे जाव वंदति नमंति ता एवं वयासी - काले णं भंते ! कुमारे तीहिं दंतिसहस्सेहिं जाव रहमुसलं संगामं संगामेमाणे चेडएणं रत्ता एगाहच्चं कूडाहच्चं जीवियाओ ववरोविते समाणे कालमासे कालं किच्चा कहिं गते कहिं उववन्ने ?, गोयमाति ! समणे० भगवं गोयमं एवं वदासी- एवं खलु गो० ! काले कुमारे तीहिं दंतिसहस्सेहिं जाव जीवियाओ ववरोवित समाणे कालमासे कालं किच्चा चउत्थीए पंकप्पभाए पुढवीए हेमाभे नरगे दससागरोवमठिइएसु नेरइएसु नेरइयत्ताए उववन्ने ।८। काले णं भंते ! कुमारे केरिसएहिं आरंभेहिं केरिसएहिं (समारंभेहिं केरिसएहिं) आरंभसमारंभेहिं केरिसएहिं भोगेहिं केरिसएहिं संभोगेहिं केरिसएहिं भोगसंभोगेहिं केरिसेण वा असुभकडकम्मपब्भारेणं कालमासे कालं किच्चा चउत्थीए पंकप्पभाए पुढवीए जाव नेरइयत्ताए उववन्ने ?, एवं खलु गो० ! तेणं कालेणं० रायगिहे नामं नयरे होत्था रिद्धत्थिमियसमिद्धे०, तत्थ णं रायगिहे नयरे सेणिए नामं राया होत्था महया० तस्सणं सेणियस्स रत्तो नंदा नामं देवी होत्था सोमाला जाव विहरति, तस्स णं सेणियस्स रत्तो नंदाए देवीए अत्तए अभए नामं कुमारे होत्था सोमाले जाव सुरूवे साम० जहा चित्तो जाव रज्जधुराचिंतए यावि होत्था, तस्स णं सेणियस्स रत्तो चेल्लणा नामं देवी होत्था सोमाला जाव विहरइ, तते णं सा चिल्लणा देवी अन्नया कयाई तंसिं तारिसयंसि वासघरंसि जाव सीहं सुमिणे पासित्ताणं पडिबुद्धा जहा पभावती जाव सुमिणपाढगा पडिविसज्जिता जाव चिल्लणा से वयणं पडिच्छित्ता जेणेव सए भवणे तेणेव अणुपविट्ठा ।९। तते णं तीसे चेल्लणाए देवीए अन्नया कयाईतिण्हं मासाणं बहुपडिपुण्णाणं अयमेयारूवे दोहले पाउब्भूए- धन्नाओ णं ताओ अम्मयाओ जाव जम्मजीवियफले जाओ णं सेणियस्स रत्तो उदरवलीमंसेहिं सोल्लेहि य तलिएहि य भज्जितेहि य सुरं च जाव पसन्नं च आसाएमाणीओ जाव परिभाएमाणीओ दोहलं पविणेति, तते णं सा चेल्लणा देवी तंसिं दोहलंसि अविणिज्जमाणंसि सुक्का भुक्खा निम्मंसा ओलुग्गा ओलुग्गसरीरा नित्तेया दीणविमणवयणा पंडुल्लइयमुही ओमंथियनयणवयणकमला जहोचियं पुप्फवत्थगंधमल्लालंकारं अपरिभुंजमाणी करतलमलियव्व कमलमाला ओहतमणसंकप्पा जाव झियायति, ततेणं तीसे चेल्लणाए देवीए अंगपडियारियातो चेल्लणं देविं सुक्कं भुक्खं जाव झियायमाणं पासंति ता जेणेव सेणिए राया तेणेव उवागच्छंति ता जाव कट्ठु सेणियं रायं एवं वयासी- एवं खलु सामी ! चेल्लणा देवी न याणामो केणई कारणेणं सुक्का भुक्खा जाव झियायति, तते णं से सेणिए राया तासिं अंगपडियारियाणं अंतिए एयमट्ठं सोच्चा निसम्म तहेव संभंते समाणे जेणेव चेल्लणा देवी तेणेव उवागच्छइ ता चिल्लणं देविं सुक्कं भुक्खं जाव झियायमाणं पासित्ता एवं वयासी- किन्नं तुमं देवाणुप्पिए ! सुक्का भुक्खा जाव झियायसि ?, तते णं सा चेल्लणा देवी सेणियस्स रण्णो एयमट्ठं णो आढाति णो परिजाणाति तुसिणीया संचिद्धति, तते णं से सेणिए

राया चेल्लणं देविं दोच्चंपि तच्चंपि एवं वयासी- किं णं अहं देवाणुप्पिए ! एयमट्ठस्स नो अरिहे सवणयाए जं णं तुमं अयमट्ठं रहस्सीकरेसि ?, तते णं सा चेल्लणा, देवी सेणिएणं रत्ता दोच्चंपि तच्चंपि एवं वुत्ता समाणी सेणियं रायं एवं वयासी-णत्थि णं सामी ! से केति अट्ठे जस्स णं तुब्भे अणरिहा सवणयाए, नो चेव णं इमस्स अट्ठस्स सवणयाए. एवं खलु सामी ! ममं तस्स ओरालस्स जाव महासुमिणस्स तिण्हं मासाणं बहुपडिपुण्णाणं अयमेयारूवे दोहले पाउब्भू-धन्नातो णं तातो अम्मयाओ जाव जाओ णं तुब्भं उदरवलिमंसेहिं सोल्लिएहि य जाव दोहलं विणेति, तते णं अहं सामी ! तंसिं दोहलंसि अविणिज्जमाणंसि सुक्का भुक्खा जाव झियायामि, तते णं से सेणिए राया चेल्लणं देविं एवं वदासी-मा णं तुमं देवाणुप्पिए ! ओहय जाव झियायाहि, अहं णं तहा घत्तिस्सामि जहा णं तव दोहलस्स संपत्ती भविस्सतीतिकट्ठु चिल्लणं देविं ताहिं इट्ठाहिं कंताहिं पियाहिं मणुत्ताहिं मणामाहिं ओरालाहिं कल्लाणाहिं सिवाहिं धन्नाहिं मंगल्लाहिं मियमधुरसस्सिरीयाहिं वग्गूहिं समासासेति, चिल्लणाए देवीए अंतियातो पडिनिक्खमत्ति ता जेणेव बाहिरिया उवट्ठाणसाला जेणेव सीहासणे तेणेव उवागच्छइ ता सीहासणवरंसि पुरत्थाभिमुहे निसीयति, तस्स दोहलस्स संपत्तिनिमित्तं बहूहिं आएहिं उवाएहि य उप्पत्तियाए य वेणइयाए य कम्मियाहि य पारिणामियाहि य परिणामेमाणे २ तस्स दोहलस्स आयं वा उवायं वा ठिइं वा अविंदमाणे ओहयमणसंकप्पे जाव झियायति, इमे य णं अभए कुमारे ण्हाए जाव सरीरे सयाओ गिहाओ पडिनिक्खमत्ति ता जेणेव बाहिरिया उवट्ठाणसाला जेणेव सेणिए राया तेणेव उवागच्छति ता सेणियं रायं ओहय जाव झियायमाणं पासति ता एवं वदासी-अन्नया णं तातो ! तुब्भे ममं पासित्ता हट्ठजावहियया भवह, किन्नं तातो ! अज्ज तुब्भे ओहय जाव झियायह ?, तं जइ णं अहं तातो ! एयस्सट्ठस्स अरिहे सवणयाए तो णं तुब्भे मम एयमट्ठं जहाभूतमवितहं असंदिद्धं परिकहेह जे (जा) णं अहं तस्स अट्ठस्स अंतगमणं करेमि, तते णं से सेणिए राया अभयं कुमारे एवं वदासी-णत्थि णं पुत्ता ! से केइ अट्ठे जस्स णं तुमं अणरिहे सवणयाए, एवं खलु पुत्ता ! तव चुल्लमाउयाए चेल्लणाए देवीए तस्स ओरालस्स जाव महासुमिणस्स तिण्हं मासाणं बहुपडिपुत्ताणं जाव जाओ णं मम उदरवलीमंसेहिं सोल्लेहि य जाव दोहलं विणेति, तते णं सा चिल्लणा देवी तंसिं दोहलंसि अविणिज्जमाणंसि सुक्का जाव झियाति, तते णं अहं पुत्ता ! तस्स दोहलस्स संपत्तिनिमित्तं बहूहिं आएहिं य जाव ठितिं वा अविंदमाणे ओहय जाव झियामि, तए णं से अभए कुमारे सेणियं रायं एवं वदासी-मा णं तातो ! तुब्भे ओहय जाव झियायह अहं णं तहा ज (घ) तिहामि जहा णं मम चुल्लमाउयाए चिल्लणाए देवीए तस्स दोहलस्स संपत्ती भविस्सतीतिकट्ठु सेणियं रायं ताहिं इट्ठाहिं जाव वग्गूहिं समासासेति ता जेणेव सए गिहे तेणेव उवागच्छइ ता अब्भितरए रहस्सितए ठाणिज्जे पुरिसे सद्दावेति ता एवं वयासी-गच्छह णं तुब्भे देवाणुप्पिया ! सूणातो अल्लं मंसं रूहिरं बत्थिपुडगं च गिण्हह, तते णं ते ठाणिज्जा पुरिसा अभएणं कुमारेणं एवं वुत्ता समाणा हट्ठं करतल जाव पडिसुणेत्ता अभयस्स कुमारस्स अंतियाओ पडिनिक्खमत्ति ता जेणेव सूणा तेणेव उवागच्छन्ति ता अल्लमंसं रूहिरं बत्थिपुडगं च गिण्हंति ता जेणेव अभए कुमारे तेणेव उवागच्छंति ता करतलं तं अल्लमंसं रूहिरं बत्थिपुडगं च उवणेति, तते णं से अभए कुमारे तं अल्लमंसं रूहिरं कप्पणिकप्पियं करेति ता जेणेव सेणिए राया तेणेव उवां ता सेणियं रायं रहस्सिगयं सयणिज्जंसि उत्ताणयं नुवज्जावेति ता सेणियस्स उदरवलीसु तं अल्लमंसं रूहिरं विरवेति ता बत्थिपुडणं वेढेति ता सवंतीकरणं करेति ता चेल्लणं देवि उप्पिं पासादे अवलोयणवरगयं ठावेति ता चेल्लणाए देवीए अहे सपक्खिं सपडिदिसिं सेणियं रायं सयणिज्जंसि उत्ताणगं निवज्जावेति, सेणियस्स रत्तो उदरवलिमंसाइं कप्पणिकप्पियाइं करेति ता सेयभायणंसि पक्खिवति, तते णं से सेणिए राया अलियमुच्छियं करेति ता मुहुत्तंतरेणं अन्नमन्नेणं सद्धिं संलवमाणे चिट्ठति, तते णं से अभयकुमारे सेणियस्स रत्तो उदरवलिमंसाइं गिण्हेति ता जेणेव चिल्लणा देवी तेणेव उवागच्छइ ता चेल्लणाए देवीए उवणेति, तते णं सा चिल्लणा सेणियस्स रत्तो तेहिं उदरवलिमंसेहिं सोल्लेहिं जाव दोहलं विणेति, तते णं सा चिल्लणा देवी संपुण्णदोहला एवं संमाणियदोहला विच्छिन्नदोहला तं गब्भं सुहंसुहेणं परिवहति । १०। तते णं तीसे चेल्लणाए अन्नया कयाई पुव्वरत्तावरत्तकालसमयंसि अयमेयारूवे जाव समुप्पज्जित्था-जइ ताव इमेणं दारणं गब्भगणं चेव पिउणो उदरवलिमंसाणि खाइयाणि तं सेयं खलु मम एयं गब्भं साडित्तए वा पाडित्तए वा गालित्तए वा विद्धंसित्तए वा, एवं संपेहेति ता तं गब्भं बहूहिं

गब्भसाडणेहि य गब्भपाडणेहिं य गब्भगालणेहि य गब्भविद्धंसणेहि य इच्छति साडित्तए वा पाडित्तए वा गालित्तए वा विद्धंसित्तए वा, नो चेव णं से गब्भे सडति वा पडति वा गलति वा विद्धंसति वा, तते णं सा चिल्लणा देवी तं गब्भं जाहे नो संचाएति बहूहिं गब्भसाडणेहि य जाव विद्धंसित्तए वा ताहे संता तंता परितंता निव्विन्ना समाणी अकामिया अवसवसा अट्टवसट्टुदुहट्टा तं गब्भं परिवहति । ११। तते णं सा चिल्लणा देवी नवण्हं मासाणं बहुपडिपुण्णाणं जाव सोमालं सुरूवं दारयं पयाया, तते णं तीसे चेल्लणाए देवीए इमे एतारूवे जाव समुप्पज्जित्था-जइ ताव इमेणं दारएणं गब्भगएणं चेव पिउणो उदरवलिमंसाइं खाइयाइं तं न नज्जइ णं एस दारए संवड्ढमाणे अम्हं कुलस्स अंतकरे भविस्सति तं सेयं खलु अम्हं एयं दारगं एगंते उक्कुरुडियाए उज्झावित्तए, एवं संपेहेति ता दासचेडिं सद्दावेति ता एवं वयासी-गच्छह णं तुमं देवाणुप्पिए ! एयं दारगं एगंते उक्कुरुडियाए उज्झाहि, तते णं सा दासचेडी चेल्लणाए देवीए एवं वुत्ता समाणी करतल जाव कट्टु चिल्लणाए देवीए एतमट्टं विणएणं पडिसुणेति ता तं दारगं करतलपुडेणं गिण्हेइ ता जेणेव असोगवणिया तेणेव उवा० ता तं दारगं एगंते उक्कुरुडियाए उज्झति, तते णं तेणं दारएणं एगंते उक्कुरुडियाए उज्झितेणं समाणेणं सा असोगवणिया उज्जोविता यावि होत्था, तते णं से सेणिए राया इमीसे कहाए लब्धे समाणे जेणेव असोगवणिया तेणेव उवा० ता तं दारगं एगंते उक्कुरुडियाए उज्झियं पासेति ता आसुरुत्ते जाव मिसिमिसेमाणे तं दारगं करतलपुडेणं गिण्हति ता जेणेव चिल्लणा देवी तेणेव उवा० ता चेल्लणं देविं उज्जावयाहिं आओसणाहिं आओसति उच्चावयाहिं निब्भच्छणाहिं निब्भच्छेति एवं उद्धंसणाहिं उद्धंसेति ता एवं वयासी-कीस णं तुमं मम पुत्तं एगंते उक्कुरुडियाए उज्झावेसित्तिकट्टु चेल्लणं देविं उच्चावयसवहसावितं करेति ता एवं वयासी-तुमं णं देवाणुप्पिए ! एयं दारगं अणुपुव्वेणं सारक्खमाणी संगोवेमाणी संवड्ढेहि, तते णं सा चेल्लणा देवी सेणिएणं रत्ता एवं वुत्ता समाणी लज्जिया विलिया विड्डा करतलपरिगगहियं० सेणियस्स रत्तो विणएणं एयमट्टं पडिसुणेति ता तं दारगं अणुपुव्वेणं सारक्खमाणी संगोवेमाणी संवड्ढेति । १२। तते णं तस्स दारगस्स एगंते उक्कुरुडियाए उज्झिज्जमाणस्स अग्गंगुलियाए कुक्कुडपिच्छएणं दूमिया यावि होत्था, अभिक्खणं २ पूयं सोणियं च अभिनिस्सवेति, तते णं से दारए वेदणाभिभूए समाणे महता २ सद्देणं आरसति, तते णं सेणिए राया तस्स दारगस्स आरसितसद्दं सोच्चा निसम्म जेणेव से दारए तेणेव उवा० ता तं दारगं करतलपुडेणं गिण्हइ ता तं अग्गंगुलियं आसयंसि पक्खिवति ता पूइं च सोणियं च आसएणं आमुसति, तते णं से दारए निव्वुए निव्वेदणे तुसिणीए संचिट्टइ, जाहेविय णं से दारए वेदणाए अभिभूते समाणे महता २ सद्देणं आरसति ताहेविय णं सेणिए राया जेणेव से दारए तेणेव उवा० ता तं दारगं करतलपुडेणं गिण्हति तं चेव जाव निव्वेयणे तुसिणीए संचिट्टइ, तते णं तस्स दारगस्स अम्मापियरो ततिए दिवसे चंदसूरदंसणियं करेति जाव संपत्ते बारसाहे दिवसे अयमेयारूवं गुणं गुणनिप्फन्नं नामधिज्जं करेति-जहा णं अम्हं इमस्स दारगस्स एगंते उक्कुरुडियाए उज्झिज्जमाणस्स अग्गंगुलिया कुक्कुडपिच्छएणं दूमिया तं होउ णं अम्हं इमस्स दारगस्स नामधिज्जं कूणिए, तते णं तस्स दारगस्स अम्मापियरो नामधिज्जं करेति-कूणियत्ति २, तते णं तस्स कूणियस्स आणुपुव्वेणं ठितिवडियं च जहा मेहस्स जाव उप्पिं पासायवरगए विहरति, अट्टओ दाओ । १३। तते णं तस्स कूणियस्स कुमारस्स अन्नदा पुव्वरत्ता जाव समुप्पज्जित्था-एवं खलु अहं सेणियस्स रत्तो वाघाएणं नो संचाएमि सयमेव रज्जसिरिं करेमाणे पालेमाणे विहरित्तए तं सेयं खलु मम सेणियं रायं नियलबंधणं करेत्ता अप्पाणं महता २ रायाभिसेएणं अभिसिंचावित्तएत्तिकट्टु एवं संपेहेति ता सेणियस्स रत्तो अंतराणि य छिड्डाणि य विवराणि य पडिजागरमाणे विहरति, तते णं से कूणिए कुमारे सेणियस्स रत्तो अंतरं वा जाव मम्मं वा अलभमाणे अन्नदा कयाई कालादीए दस कुमारे नियघरे सद्दावेति ता एवं वदासी-एवं खलु देवाणुप्पिया ! अम्हे सेणियस्स रत्तो वाघाएणं नो संचाएमो सयमेव रज्जसिरिं करेमाणा पालेमाणा विहरित्तए तं सेयं खलु देवाणुप्पिया ! अम्हं सेणियं रायं नियलबंधणं करेत्ता रज्जं च रट्ठं च बलं च वाहणं च कोसं च कोट्टागारं च जणवयं च एक्कारसभाए विरिंचित्ता सयमेव रज्जसिरिं करेमाणाणं पालेमाणाणं जाव विहरित्तए, तते णं ते कालादीया दस कुमारा कूणियस्स कुमारस्स एयमट्टं विणएणं पडिसुणेति, तते णं से कूणिए कुमारे अन्नदा कदाई सेणियस्स रत्तो अंतरं जाणति ता सेणियं रायं नियलबंधणं करेति ता अप्पाणं महता २ रायाभिसेएणं अभिसिंचावेति, तते णं से कूणिए कुमारे राजा जाते महता-, तते णं से कूणिए राया अन्नदा कदाई ण्हाए जाव

सव्वालंकारविभूसिए चेल्लणाए देवीए पायवंदए हव्वमागच्छति । १४ । तते णं से कूणिए राया चेल्लणं देविं ओह्य जाव झियायमाणं पासति ता चेल्लणाए देवीए पायगगहणं करेति ता चेल्लणं देविं एवं वदासी-किं णं अम्मो ! तुम्हं न तुट्ठी वा न ऊसए (वे) वा न हरिसे वा नाणंदे वा ? जं णं अहं सयमेव रज्जसिरिं जाव विहरामि, तते णं सा चेल्लणा देवी कूणियं रायं एवं वयासी-कहणं पुत्ता ! ममं तुट्ठी वा उस्सए वा हरिसे वा आणंदे वा भविस्सति ? जं णं तुमं सेणियं रायं पियं देवयं गुरूं जणगं अच्चंतनेहाणुरागरत्तं नियलबंधणं करित्ता अप्पाणं महता २ रायाभिसेएणं अभिसिंचावेसि, तते णं से कूणिए राया चिल्लणं देविं एवं वदासी-घातेउकामे णं अम्मो ! ममं सेणिए राया, एवं मारेतुं बंधितुं णिच्छुभिउकामए णं अम्मो ! ममं सेणिए राया, तं कहन्नं अम्मो ! ममं सेणिए राया अच्चंतनेहाणुरागरत्ते ?, तते णं सा चेल्लणा देवी कूणियं कुमारं एवं वदासी-एवं खलु पुत्ता ! तुमंसि ममं गब्भे आहूते समाणे तिण्हं मासाणं बहुपडिपुन्नाणं ममं अयमेयारूवे दोहले पाउब्भूते धन्नातो णं तातो अम्मयातो जाव अंगपडिचारियाओ निरवसेसं भाणियव्वं जाव जाहेविय णं तुमं वेयणाए अभिभूते महता जाव तुसिणीए संचिद्धसि, एवं खलु तव पुत्ता ! सेणिए राया अच्चंतनेहाणुरागरत्ते, तते णं से कूणिए राया चेल्लणाए देवीए अंतिए एयमट्ठं सोच्चा निसम्म चिल्लणं देविं एवं वदासी-दुट्ठु णं अम्मो ! मए कयं सेणियं रायं पियं देवयं गुरूं जणगं अच्चंतनेहाणुरागरत्तं नियलबंधणं करंतेणं, तं गच्छामि णं सेणियस्स रत्तो सयमेव नियलाणि छिंदामित्तिकट्ठु परसुहत्थगते जेणेव चारगसाला तेणेव पहारित्थ गमणाए, तते णं सेणिए राया कूणियं कुमारं परसुहत्थगयं एज्जमाणं पासति ता एवं वयासी-एस णं कूणिए कुमारे अपत्थियपत्थए जाव सिरिहिरिपरिवज्जिए परसुहत्थगए इह हव्वमागच्छति तं न नज्जइ णं ममं केणई कुमारेणं मारिस्सतीतिकट्ठु भीए जाव संजायभए तालपुडगं विसं आसगंसि परिकखवइ, तते णं से सेणिए राया तालपुडगविसे आसगंसि पक्खित्ते समाणे मुहुत्तंतरेणं परिणममाणंसि निप्पाणे निच्चेट्ठे जीवविप्पजढे ओइन्ने, तते णं से कूणिए कुमारे जेणेव चारगसाला तेणेव उवागए, सेणियं रायं निप्पाणं निच्चेट्ठं जीवविप्पजढं ओइन्नं पासति ता महता पितिसोएणं अप्फुण्णे समाणे परसुनियत्तेविव चंपगवरपादवे धसत्ति धरणीतलंसि सव्वंगेहिं संनिवडिए, तते णं से कूणिए कुमारे मुहुत्तंतरेणं आसत्थे समाणे रोयमाणे कंदमाणे सोयमाणे विलवमाणे एवं वदासी-अहो णं मए अधन्नेणं अपुन्नेणं अकयपुन्नेणं दुट्ठु कयं सेणियं रायं पियं देवयं० अच्चंतनेहाणुरागरत्तं नियलबंधणं करंतेणं मम मूलागं चेव णं सेणिए राया कालगतेत्तिकट्ठु ईसर० जाव संधिवाल सद्धिं संपरिवुडे रोयमाणे० महया इडिढसक्कारसमुदएणं सेणियस्स रत्तो नीहरणं करेति, बहूइं लोइयाइं मयकिच्चाइं करेति, तते णं से कूणिए कुमारे एतेणं महया मणोमाणसिएणं दुक्खेणं अभिभूते समाणे अन्नदा कदाई अंतेउरपरियालसंपरिवुडे सभंडमत्तोवरणमाताए रायगिहातो पडिनिक्खमति ता जेणेव चंपा नगरी तेणेव उवागच्छइ, तत्थवि णं विपुलभोगसमितिसमन्नागए काले णं अप्पसोए जाए यावि होत्था । १५ । तते णं से कूणिए राया अन्नया कयाई कालादीए दस कुमारे सद्दावेति ता रज्जं च जाव जणवयं च एक्कारसभाए विरिंचति ता सयमेव रज्जसिरिं करेमाणे पालेमाणे विहरति । १६ । तत्थ णं चंपाए नगरीए सेणियस्स रत्तो पुत्ते चेल्लणाए देवीए अत्तए कूणियस्स रत्तो सहोयरे कणीयसे भाया वेहल्ले नामं कुमारे होत्था सोमाले जाव सुरूवे, तते णं तस्स वेहल्लस्स कुमारस्स सेणिएणं रत्ता जीवंतएणं चेव सेयणए गंधहत्थी अट्टारसवंके य हारे पुव्वदिन्ने, तए णं से वेहल्ले कुमारे सेयणएणं गंधहत्थिणा अंतेउरपरियालसंपरिवुडे चंपं नगरिं मज्झमज्झेणं निग्गच्छइ ता अभिक्खणं २ गंगं महानइं मज्जणयं ओयरइ, तते णं से सेयणए गंधहत्थी देवीओ सोंडाए गहाय ताओ उब्बयत्तइ ता अप्पेगइयाओ पुट्ठे ठवेति अप्पेगइयाओ खंधे ठवेति एवं अप्पे० कुंभे ठवेति अप्पे० सीसे ठवेति अप्पे० दंतमुसले ठवेति अप्पे० सोंडाए गहाय उड्ढं वेहासं उव्विहइ अप्पे० सोंडागयाओ अंदोलावेति अप्पे० दंतंतरेसु नीणेति अप्पे० सीभरेणं ण्हाणेति अप्पे० अणेगेहिं कीलावणेहिं कीलावेति, तते णं चंपाए नयरीए सिंघाडगतिगचउक्कचच्चरमहापहपहेसु बहुजणो अन्नमन्नस्स एवमाइक्खइ जाव परूवेति-एवं खलु देवाणुप्पिया ! वेहल्ले कुमारे सेयणएणं गंधहत्थिणा अंतेउरं तं चेव जाव णेगेहिं कीलावणएहिं कीलावेति तं एस णं वेहल्ले कुमारे रज्जसिरिफलं पच्चणुब्भवमाणे विहरति, नो कूणिए राया, तते णं तीसे पउमावईए देवीए इमीसे कहाए लद्धट्ठाए समाणीते अयमेयारूवे जाव समुप्पज्जित्था-एवं खलु वेहल्ले कुमारे सेयणएणं गंधहत्थिणा जाव अणेगेहिं कीलावणएहिं कीलावेति तं एस णं वेहल्ले

कुमारे रज्जसिरिफलं (२२४) पच्चणुब्भवमाणे विहरति, नो कोणिए राया, तं किं अम्हं रज्जेण वा जाव जणवएण वा जइ णं अम्हं सेयणगे गंधहत्थी नत्थि ?, तं सेयं खलु ममं कूणियं रायं एयमट्ठं विन्नवित्तएत्तिकट्ठ एवं संपेहेति ता जेणेव कूणिए राया तेणेव उवा० ता करतल जाव एवं वयासी-एवं खलु सामी ! वेहल्ले कुमारे सेयणएण गंधहत्थिणा जाव अणेगेहिं कीलावणएहिं कीलावेति, तं किण्णं सामी ! अम्हं रज्जेण वा जाव जणवएण वा जति णं अम्हं सेयणए गंधहत्थी नत्थि ?, तए णं से कूणिए राया पउमावईए देवीए एयमट्ठं नो आढाति नो परिजाणति तुसिणीए संचिद्धति, तते णं सा पउमावई देवी अभिक्खणं २ कूणियं रायं एयमट्ठं विन्नवेइ, तते णं से कूणिए राया पउमावईए देवीए अभिक्खणं २ एयमट्ठं विन्नविज्जमाणे अन्नया कयाई वेहल्लं कुमारं सद्दावेति ता सेयणगं गंधहत्थिं अट्टारसवंकं च हारं जायति, तते णं से वेहल्ले कुमारे कूणियं रायं एवं वयासी-एवं खलु सामी ! सेणिएणं रण्णा जीवन्तेणं चेव सेयणए गंधहत्थी अट्टारसवंके य हारे दिन्ने, तं जइ णं सामी ! तुब्भे ममं रज्जस्स य जणवयस्स य अब्बं भागं दलयह तो णं अहं तुब्भं सेयणयं गंधहत्थिं अट्टारसवंकं च हारं दलयामि, तते णं से कूणिए राया वेहल्लस्स कुमारस्स एयमट्ठं नो आढाति नो परिजाणाइ, अभिक्खणं २ सेयणगं गंधहत्थिं अट्टारसवंकं च हारं जायति, तए णं तस्स वेहल्लस्स कुमारस्स कूणिएणं रन्ना अभिक्खणं २ सेयणगं गंधहत्थिं अट्टारसवंकं च हारं जायमाणस्स एवं संकप्पे समुप्पज्जित्था-अक्खिविउकामे णं गिण्हिउकामे णं उद्दालेउकामे णं ममं कूणिए राया सेयणगं गंधहत्थिं अट्टारसवंकं च हारं तं जावताव ममं कूणिए राया सेयणगं गंधहत्थिं अट्टारसवंकं च हारं न उद्दालेइ ताव मे सेयणगं गंधहत्थिं अट्टारसवंकं च हारं गहाय अन्तेउरपरियालसंपरिवुडस्स सभंडमत्तोवकरणमाताए चंपातो नयरीतो पडिनिक्खमित्ता वेसालीए नयरीए अज्जगं चेडयं रायं उवसंपज्जित्ताणं विहरित्तए, एवं संपेहेति ता कूणियस्स रन्नो अन्तराणि जाव पडिजागरमाणे २ विहरति, तते णं से वेहल्ले कुमारे अन्नदा कदाई कूणियस्स रन्नो अन्तरं जाणति ता सेयणगं गंधहत्थिं अट्टारसवंकं च हारं गहाय अन्तेउरपरियालसंपरिवुडे सभंडमत्तोवकरणमायाए चंपाओ नयरीतो पडिनिक्खमति ता जेणेव वेसाला नगरी तेणेव उवागच्छति वेसालाए नगरीए अज्जगं चेडयं रायं उवसंपज्जित्ताणं विहरति, तते णं से कूणिए राया इमीसे कहाए लब्धहे समाणे एवं खलु वेहल्ले कुमारे ममं असंविदितेणं सेयणगं गंधहत्थिं अट्टारसवंकं च हारं गहाय अन्तेउरपरियालसंपरिवुडे जाव अज्जयं चेडयं रायं उवसंपज्जित्ताणं विहरति, तं सेयं खलु ममं सेयणगं गंधहत्थिं अट्टारसवंकं च हारं० (पडुच्च) दूतं पेसित्तए, एवं संपेहेति ता दूतं सद्दावेति ता एवं वयासी-गच्छह णं तुमं देवाणुप्पिया ! वेसालिं नगरिं, तत्थ णं तुमं ममं अज्जगं चेडगं रायं करतल० वद्धावेत्ता एवं वयासी-एवं खलु सामी ! कूणिए राया विन्नवेति-एस णं वेहल्ले कुमारे कूणियस्स रन्नो असंविदितेणं सेयणगं अट्टारसवंकं हारं च गहाय हव्वमागते, तए णं तुब्भे सामी ! कूणियं रायं अणुगिण्हमाणा सेअणगं अट्टारसवंकं च हारं कूणियस्स रन्नो पच्चप्पिणह, वेहल्लं कुमारं च पेसेह, तते णं से दूए कूणिएण रण्णा एवं वुत्ते समाणे करतल० जाव पडिसुणति ता जेणेव सते गिहे तेणेव उवा० ता जहेव चित्ते तहेव जाव चेडयं रायं जएणं विजएणं वद्धावइ ता एवं वयासी-एवं खलु सामी ! कूणिए राया विन्नवेइ-एस णं वेहल्ले कुमारे तहेव भाणियव्वं जाव वेहल्लं कुमारं पेसेह, तते णं से चेडए राया तं दूयं एवं वयासी-जह चेव णं देवाणुप्पिया ! कूणिए राया सेणियस्स रन्नो पुत्ते चेल्लणाए देवीए अत्तए ममं नत्तुए तहेव णं वेहल्लेवि कुमारे सेणियस्स रन्नो पुत्ते चेल्लणाए देवीए अत्तए ममं नत्तुए, सेणिएणं रन्ना जीवन्तेणं चेव वेहल्लस्स कुमारस्स सेयणगे गंधहत्थी अट्टारसवंके य हारे पुव्वविदिन्ने, तं जइ णं कूणिए राया वेहल्लस्स रज्जस्स य जणवयस्स य अब्बं दलयति तो णं अहं सेयणगं अट्टारसवंकं हारं च कूणियस्स रन्नो पच्चप्पिणामि, वेहल्लं च कुमारं पेसेमि, तं दूयं सक्कारेति संमाणेति ता पडिविसज्जेति, तते णं से दूते चेडएणं रन्ना पडिविसज्जिए समाणे जेणेव चाउग्घंटे आसरहे तेणेव उवागच्छइ ता चाउग्घंटे आसरहं दुरूहति, वेसालिं नगरिं मज्झमज्झेणं निग्गच्छइ ता सुभेहिं वसहीहिं पायरासेहिं जाव वद्धावित्ता एवं वदासी-एवं खलु सामी ! चेडए राया आणवेति-जह चेव णं कूणिए राया सेणियस्स रन्नो पुत्ते चेल्लणाए देवीए अत्तए ममं नत्तुए तं चेव भाणियव्वं जाव वेहल्लं च कुमारं पेसेमि, तं न देति णं सामी ! चेडए राया सेयणगं अट्टारसवंकं हारं च वेहल्लं च नो पेसेति, तते णं से कूणिए राया दुच्चंपि दूयं सद्दावेइ ता एवं वयासी-गच्छह णं तुमं देवाणु० ! वेसालिं नगरिं तत्थ णं तुमं ममं अज्जगं चेडगं रायं जाव एवं वयासी-एवं खलु सामी ! कूणिए राया विन्नवेइ-जाणि

काणि रयणाणि समुप्पज्जन्ति सव्वाणि ताणि रायकुलगामीणि, सेणियस्स रत्तो रज्जसिरिं करेमाणस्स पालेमाणस्स दुवे रयणा समुप्पन्ना, तं-सेयणए गंधहत्थी अट्टारसवंके य हारे, तन्नं तुब्भे सामी ! रायकुलपरंपरागयं ठिइयं अलोवेमाणा सेयणगं गंधहत्थिं अट्टारसवंकं च हारं कूणियस्स रत्तो पच्चप्पिणह, वेहल्लं कुमारं च पेसेह, तते णं से दूते कूणियस्स रत्तो तहेव जाव वद्धावित्ता एवं वयासी-एवं खलु सामी ! कूणिए राया विन्नवेइजाणि काणि जाव वेहल्लं कुमारं पेसेह, तते णं से चेडए राया तं दूयं एवं वयासी-जह चेव णं देवाणुप्पिया ! कूणिए राया सेणियस्स रत्तो पुत्ते चिल्लणाए देवीए अत्तए जहा पढमं जाव वेहल्लं च कुमारं पेसेमि, तं दूतं सक्कारेति संमाणेति त पडिविसज्जेति, तते णं से दूते जाव कूणियस्स रत्तो० वद्धावित्ता एवं वयासी-चेडए राया आणवेति-जह चेव णं देवाणुप्पिया ! कूणिए राया सेणियस्स रत्तो पुत्ते चिल्लणाए देवीए अत्तए जाव वेहल्लं च कुमारं पेसेमि, तं न देति णं सामी ! चेडए राया सेयणगं गंधहत्थिं अट्टारसवंकं च हारं वेहल्लं च कुमारं नो पेसेति, तते णं से कूणिए राया तस्स दूयस्स अंतिए एयमट्ठं सोच्चा निसम्म आसुरूत्ते जाव मिसिमिसेमाणे तच्चं दूतं सद्दावेति ता एवं वयासीगच्छह णं तुमं देवाणुप्पिया ! वेसालीए नयरीए चेडगस्स रत्तो वामेणं पादेणं पायपीढं अक्कमाहि ता कुंतग्गेणं लेहं पणामेहि ता आसुरूत्ते जाव मिसिमिसेमाणे तिवलियं भिउडिं निडाले साहट्टु चेडगं रायं एवं वयासी-हंभो चेडगराया ! अपत्थियपत्थिया ! दुरंत जाव परिवज्जिता एस णं कूणिए राया आणवेइ-पच्चप्पिणाहि णं कूणियस्स रत्तो सेयणगं अट्टारसवंकं च हारं वेहल्लं च कुमारं पेसेहि अहव जुद्धसज्जो चिट्ठाहि, एस कूणिए राया सबले सवाहणे सखंधावारे जुद्धसज्जे इह हव्वमागच्छति, तते णं से दूते करतल तहेव जाव जेणेव चेडए राया तेणेव उवा० ता करतल० जाव वद्धा० ता एवं वयासी-एस णं सामी ! ममं विणयपडिवत्ती, इयाणिं कूणियस्स रत्तो आणत्तित्ति चेडगस्स रत्तो वामेणं पाएणं पादपीढं अक्कमति ता आसुरूत्ते कुंतग्गेण लेहं पणामेति तं चेव सबलखंधावारे इह हव्वमागच्छति, तते णं से चेडए राया तस्स दूयस्स अंतिए एयमट्ठं सोच्चा निसम्म आसुरूत्ते जाव साहट्टु एवं वयासी-न अप्पिणामि णं कूणियस्स रत्तो सेयणगं गंधहत्थिं अट्टारसवंकं च हारं, वेहल्लं च कुमारं नो पेसेमि, एस णं जुद्धसज्जे चिट्ठामि, तं दूयं असक्कारिय असंमाणिय अवहारेणं निच्छुहावेइ । १७। तते णं से कूणिए राया तस्स दूतस्स अंतिए एयम सोच्चा णिसम्म आसुरूत्ते कालादीए दस कुमारे सद्दावेइ ता एवं वयासी-एवं खलु देवाणुप्पिया ! वेहल्ले कुमारे ममं असंविदितेणं सेयणगं गंधहत्थिं अट्टारसवंकं च हारं अंतेउरं सभंडं च गहाय चंपातो निक्खमति ता वेसालिं० अज्ज चेडगं रायं उवसंपज्जित्ताणं विहरति, तते णं मए सेयणगस्स गंधहत्थिस्स अट्टारसवंकस्स हारस्स य अट्टाए दूया पेसिया, ते य चेडएण रण्णा इमेणं कारणेणं पडिसेहिता अदुत्तरं च णं ममं तच्चं दूतं असक्कारित० अवहारेणं निच्छुहावेति तं से खलु देवाणुप्पिया ! अम्हं चेडगस्स रत्तो जत्तं गिण्हित्तए, तए णं कालाईया दस कुमारा कूणियस्स रत्तो एयमट्ठं विणएणं पडिसुणेंति, तते णं से कूणिए राया कालादीते दस कुमारे एवं वयासी-गच्छह णं तुब्भे देवाणुप्पिया सएसु २ रज्जेसु पत्तेयं २ ण्हाया जाव पायच्छित्ता हत्थिखंधवरगया पत्तेयं २ तीहिं दंतिसहस्सेहिं तीहि रहसहस्सेहिं तीहिं आससहस्सेहिं तीहिं मणुस्सकोडीहिं सद्धिं संपरिवुडा सव्विड्ढीए जाव रवेणं सतेहिंतो २ नगरेहिंतो पडिनिक्खमह ता ममं अंतियं पाउब्भवह, तते णं ते कालाईया दस कुमारा कोणियस्स रत्तो एयमट्ठं सोच्चा सएसु २ रज्जेसु पत्तेयं २ ण्हाया जाव तीहिं मणुस्सकोडीहिं सद्धिं संपरिवुडा सव्विड्ढीए जाव रवेणं सएहिंतो २ नगरेहिंतो पडिनिक्ख मंति जेणेव अंगाजणवए जेणेव चंपा नगरी जेणेव कूणिए राया तेणेव उवागता करतल जाव वद्धावेति, तते णं से कूणिए राया कोडुंबियपुरिसे सद्दावेति ता एवं वयासी-खिप्पामेव भो देवाणुप्पिया ! आभिसेक्कं हत्थिरयणं पडिकप्पेह हयगयरहचातुरंगिणिं सेणं संनाहेह ता ममं एयमाणत्तियं पच्चप्पिणह जाव पच्चप्पिणंति, तते णं से कूणिए राया जेणेव मज्जणघरे तेणेव उवागच्छइ जाव निग्गच्छित्ता जेणेव बाहिरिया उवट्ठाणसाला जाव नरवई दुरूढे, तते प से कूणिए राया तीहिं दंतिसहस्सेहिं जाव रवेणं चंपं नगरीं मज्झंमज्झेणं निग्गच्छति ता जेणेव कालादीया दस कुमारा तेणेव उवागच्छइ ता कालाइएहिं दसहिं कुमारेहिं सद्धिं एगतो मिलायंति, तते णं से कूणिए राया तेत्तीसा दंतिसहस्सेहिं तेत्तीसाए आससहस्सेहिं तेत्तीसाए रहसहस्सेहिं तेत्तीसाए मणुस्सकोडीहिं सद्धिं संपरिवुडे सव्विड्ढीए जाव रवेणं सुभेहिं वसहीहिं पायरासेहिं नातिविगिट्ठेहिं अंतरावासेहिं वसमाणे २ अंगाजणवयस्स मज्झंमज्झेणं जेणेव विदेहे जणवते जेणेव वेसाली नगरी तेणेव

पहारित्थ गमणाते, तते णं से चेडए राया इमीसे कहाए लद्धट्टे समाणे नव मल्लई नव लेच्छई कासीकोसलका अट्टारसवि गणरायाणो सद्दावेति ता एवं वयासी-एवं खलु देवाणुप्पिया ! वेहल्ले कुमारे कूणियस्स रत्तो असंविदितेणं सेयणगं अट्टारसवंकं च हारं गहाय इह हव्वमागते, तते णं कूणिएणं सेयणगस्स अट्टारसवंकस्स य अट्टाए तओ दूया पेसिया, ते य मए इमेणं कारणेणं पडिसेहिया, तते णं से कूणिए ममं एय मट्ठं अपडिसुणमाणे चाउरंगिणीए सेणाए सद्धिं संपरिवुडे जुज्झसज्जे इहं हव्वमागच्छति, तं किन्नु देवाणुप्पिया ! सेयणगं अट्टारसवंकं हारं च कूणियस्स रत्तो पच्चप्पिणामो ? वेहल्लं च कुमारं पेसेमो ? उदाहु जुज्झित्था ?, तते णं ते नवमल्लई नव लेच्छती कासीकोसलगा अट्टारसवि गणरायाणो चेडगं रायं एवं वदासी-न एयं सामी ! जुत्तं वा पत्तं वा रायसरिसं वा जन्नं सेयणगं अट्टारसवंकं च हारं कूणियस्स रत्तो पच्चप्पिणिज्जति वेहल्ले य कुमारे सरणागते पेसिज्जति, त जइ णं कूणिए राया चाउरंगिणीए सेणाए सद्धिं संपरिवुडे जुज्झसज्जे इहं हव्वमागच्छति तते णं अम्हे कूणिएणं रण्णा सद्धिं जुज्झामो, तते णं से चेडए राया ते नव मल्लई नव लेच्छई कासीकोसलगा अट्टारसवि गणरायाणो एव वदासी-जइ णं देवाणुप्पिया ! तुब्भे कूणिएणं रत्ता सद्धिं जुज्झह तं गच्छह णं देवाणुप्पिया ! सतेसु २ रज्जेसु ण्हाया जहा कालादीया जाव जएणं विजएणं वद्धावेति, तते णं से चेडए राया कोडुंबियपुरिसे सद्दावेति ता एवं वयासी आभिसेक्कं जहा कूणिए जाव दुरूढे, तते णं से चेडए राया तीहिं दंतिसहस्सेहिं जहा कूणिए जाव वेसालिं नगरिं मज्झमज्झेणं निग्गच्छति ता जेणेव ते नव मल्लई नव लेच्छती कासीकोसलगा अट्टारसवि गणरायाणो तेणेव उवागच्छति, तते णं से चेडए राया सत्तावन्नाए दंतिसहस्सेहिं सत्तावन्नाए आससहस्सेहिं सत्तावन्नाए रहसहस्सेहिं सत्तावन्नाए मणुस्सकोडीहिं सद्धिं संपरिवुडे सव्विड्ढीए जाव रवेणं सुभेहिं वसहीहिं पातरासेहिं नातिविगिट्ठेहिं अंतरावासेहिं वसमाणे २ विदेहं जणवयं मज्झमज्झेणं जेणेव देसपंते तेणेव उवा० ता खंधावारनिवेसं करेति ता कूणियं रायं पडिवालेमाणे जुज्झसज्जे चिट्ठइ, तते णं से कूणिए राया सव्विड्ढीए जाव रवेणं जेणेव देसपंते तेणेव उवा० चेडयस्स रत्तो जोयणंतरियं खंधावारनिवेसं करेति, तते णं ते दोन्निवि रायाणो रणभूमिं सज्जावेति ता रणभूमिं जयंति, तते णं से कूणिए तेत्तीसाए दंतिसहस्सेहिं जाव मणुस्सकोडीहिं गरूलवूहं रएइ ता गरूलवूहेणं रहमुसलं संगामं उवायाते, तते णं से चेडए राया सत्तावन्नाए दंतिसहस्सेहिं जाव सत्तावन्नाए मणुस्सकोडीहिं सगडवूहं रएइ ता सगडवूहेणं रहमुसलं संगामं उवायाते, तते णं ते दोण्हवि राईणं अणीया सन्नद्ध जाव गहियाउहपहरणा मंगतितेहिं फलतेहिं निक्कट्ठाहिं असीहिं अंसागएहि तोणेहिं सजीवेहिं धणूहिं समुक्खित्तेहिं सरेहिं समुल्लालिताहिं डावाहिं ओसारियाहिं उरुघंटाहिं छिप्पतूरेणं वज्जमाणेणं महया उक्किट्ठसीहनायबोलकलकलरवेणं समुद्धरवभूयंपिव करेमाणा सव्विड्ढीए जाव रवेणं हयगया हयगएहिं गयगया गयगतेहिं रहगया रहगतेहिं पायत्तिया पायत्तिएहिं अन्नमन्नेहिं सद्धिं संपलग्गा यावि होत्था, तते णं ते दोण्हवि रायाणं अणिया णियगसामीसासणाणुरत्ता महता जणक्खयं जणवहं जणप्पमहं जणसंवट्ठकप्पं नच्चंतकबंधवारभीमं रुहिरकद्धं करेमाणा अन्नमन्नेणं सद्धिं जुज्झंति, तते णं से काले कुमारे तीहिं दंतिसहस्सेहिं जाव मणुस्सकोडीहिं गरूलवूहेणं एक्कारसमेणं खंधेणं कूणिएणं रण्णा सद्धिं रहमुसलं संगामं संगामेमाणे हयमहित जहा भगवता कालीए देवीए परिकहियं जाव जीवियाओ ववरोवेति, तं एवं खलु गो० ! काले कुमारे एरिसएहिं आरंभेहिं जाव एरिसएणं असुभकडकम्मपब्भारेणं कालमासे कालं किच्चा चउत्थीए पंकप्पभाए पुढवीए हेमाभे नरए नेरइयत्ताए उववन्ने । १८। काले णं भंते ! कुमारे चउत्थीए पुढवीए अणंतरं उव्वट्ठित्ता कहिं गच्छिहिति कहिं उव्वज्जिहिति ?, गो० ! महाविदेहे वासे जाइं कुलाइं भवंति तं०-अड्ढाइं जहा दढप्पइओ जाव सिज्झिहिति बुज्झिहिति जाव अंतं काहिति, तं एवं खलु जंबू ! समणेणं भगवया जाव संपत्तेणं

निरयावलियाणं पढमस्स अज्झयणस्स अयमट्ठे पं० । १९॥ **कालज्झयणं ८-१॥** जइ णं भंते ! समणेणं जाव संपत्तेणं निरयावलियाणं पढमस्स अज्झयणस्स अयमट्ठे पं० दोच्चस्स णं भंते ! अज्झयणस्स निरयावलियाणं समणेणं भगवया जाव संपत्तेणं के अट्ठे पं० ?, एवं खलु जंबू ! तेणं कालेणं० चंपा नामं नगरी होत्था, पुन्नभदे चेइए, कोणिए राया, पउमावई देवी, तत्थ णं चंपाए नयरीए सेणियस्स रत्तो भज्जा कोणियस्स रत्तो चुल्लमाउया सुकाली नामं देवी होत्था

सुकुमाला०, तीसे णं सुकालीए देवीए पुत्ते सुकाले नामं कुमारे होत्था सुकुमाले०, तते णं से सुकाले कुमारे अन्नया कयाति तीहिं दंतिसहरस्सेहिं जहा कालो कुमारो निरवसेसं तं चेव जाव महाविदेहे वासे अंतं काहिति, एवं निरयावलियाणं बीयस्स अज्झयणस्स अयमट्ठे पण्णत्तेत्ति बेमि ॥ **बितियं सुकालअज्झयणं ८-२॥** एवं सेसावि अट्ठ अज्झयणा नेयव्वा पढमसरिसा, णवरं मायातो सरिसणामाओ ।२०॥ **अज्झयणाणि ३-१०॥ निरयावलियातो समत्तातो ८।** निक्खेवो सव्वेसिं भाणियव्वो ॥ श्रीकप्पवडिंसिया-जति णं भंते ! समणेणं भगवया जाव संपत्तेणं उवंगाणं पढमस्स वग्गस्स निरयावलियाणं अयमट्ठे पं० दोच्चस्स णं भंते ! वग्गस्स कप्पवडिंसियाणं समणेणं जाव संपत्तेणं कइ अज्झयणा पं० ?, एवं खलु जंबू ! समणेणं भगवया जाव संपत्तेणं कप्पवडिंसियाणं दस अज्झयणा पं० तं०-पउमे महापउमे भदे सुभदे पउमभदे पउमसेणे पउमगुम्मे नलिणिगुम्मे आणंदे नंदणे, जइ णं भंते ! समणेणं जाव संपत्तेणं कप्पवडिंसियाणं दस अज्झयणा पं० पढमस्स णं भंते ! अज्झयणस्स कप्पवडिंसियाणं समणेणं भगवया जाव के अट्ठे पं० ?, एवं खलु जंबू ! तेणं कालेणं० चंपा नामं नयरी होत्था, पुण्णभदे चेइए, कूणिए राया, पउमावई देवी, तत्थ णं चंपाए नयरीए सेणियस्स रत्तो भज्जा कूणियस्स रत्तो चुल्लमाउया काली नामं देवी होत्था सुकुमाला०, तीसे णं कालीए देवीए पुत्ते काले नामं कुमारे होत्था सुकुमाले०, तस्स णं कालस्स कुमारस्स पउमावई नामं देवी होत्था सोमाला जाव विहरति, तते णं सा पउमावई देवी अन्नया कयाई तंसि तारिसगंसि वासघरंसि अब्भितरतो सचित्तकम्मे जाव सीहं सुमिणे पासित्ताणं पडिबुद्धा, एवं जम्मणं जहा महाबलस्स जाव नामधिज्जं, जम्हा णं अम्हं इमे दारए कालस्स कुमारस्स पुत्ते पउमावईए देवीए अत्तए तं होउ णं अम्हं इमस्स दारगस्स नामधिज्जं पउमेत्ति २, सेसं जहा महाबलस्स, अट्ठओ दातो, जाव पासायवरगते विहरति, सामी समोसरिए, परिसा निग्गया, कूणिते निग्गते, पउमेवि जहा महब्बले निग्गते धम्मं सोच्चा तहेव अम्मापितिआपुच्छणा जाव पव्वइए, अणगारे जाए जाव गुत्तबंभयारी, तते णं से पउमे अणगारे समणस्स भगवओ महावीरस्स तहारूवाणं थेराणं अंतिए सामाइयमादियाइं एक्कारस अंगाइं अहिज्जइ ता बहूहिं चउत्थछट्ठम जाव विहरति, तते णं से पउमे अणगारे तेणं ओरालेणं जहा मेहो तहेव धम्मजागरिया चिंता एवं जहेव मेहो तहेव समणं भगवं० आपुच्छित्ता विउलं जाव पाओवगते समाणे तहारूवाणं थेराणं अंतिए सामाइयमाइयाइं एक्कारस अंगाइं, बहुपडिपुण्णाइं पंच वासाइं सामन्नपरियाए, मासियाए संलेहणाए सट्ठिं भत्ताइं अणसणाए छेदित्ता आणुपुव्वीए कालगते, थेरा ओतिन्ना, भगवं गोयमे पुच्छइ, सामी कहेइ, जाव सट्ठिं भत्ताइं अणसणाए छेदित्ता आलोइय० उइं चंदिम० सोहम्मे कप्पे देवत्ताए उववन्ने दो सागराइं, से णं भंते ! पउमे देवे तातो देवलोगातो आउक्खएणं पुच्छा, गो० ! महाविदेहे वासे जहा दढपइन्नो जाव अंतं काहिति, एवं खलु जंबू ! समणेणं जाव संपत्तेणं कप्पवडिंसियाणं पढमस्स अज्झयणस्स अयमट्ठे पण्णत्तेत्तिबेमि ।२१॥ पउमज्झवणं ९-१॥ जइ णं भंते ! समणेणं भगवया जाव संपत्तेणं कप्पवडिंसियाणं पढमस्स अज्झयणस्स अयमट्ठे पं० दोच्चस्स णं भंते ! अज्झयणस्स के अट्ठे पं० ?, एवं खलु जंबू ! तेणं कालेणं० चंपा नामं नयरी होत्था, पुन्नभदे चेइए, कूणिए राया, पउमावई देवी, तत्थ णं चंपाए नयरीए सेणियस्स रत्तो भज्जा कोणियस्स रत्तो चुल्लमाउया सुकाली नामं देवी होत्था, तीसे णं सुकालीए पुत्ते सुकाले नामं कुमारे, तस्स णं सुकालस्स कुमारस्स महापउमा नामं देवी होत्था सुकुमाला०, तते णं सा महापउमा देवी अन्नदा कयाई तंसि तारिसगंसि एवं तहेव महापउमे नामं दारते जाव सिज्झिहिति, नवरं ईसाणे कप्पे उववाओ उक्कोसट्ठिइओ, एवं खलु जंबू ! समणेणं भगवया जाव संपत्तेणं० ॥ महापउमज्झयणं ९-२ ॥ एवं सेसावि अट्ठ नेयव्वा, मातातो सरिसणामाओ, कालादीणं दसणं पुत्ता आणुपुव्वीए, ‘दोणं च पंच चत्तारि तिणं च होति तिन्नेव । दोणं च दोणि वासा सेणियनत्तूण परियातो ॥१॥ उववातो आणुपुव्वीते पढमो सोहम्मे बितितो ईसाणे ततितो सणंकुमारे चउत्थो माहिंदे पंचमओ बंभलोए छट्ठो लंतए सत्तमओ महासुक्के अट्ठमओ सहस्सारे नवमओ पाणते दसमओ अच्चुए, सव्वत्थ उक्कोसठिई भाणियव्वा, महाविदेहे सिद्धि ।२२॥९,३-१०॥ कप्पवडिंसियाओ समत्ताओ, बितितो वग्गो दस अज्झयणा ९॥ श्रीपुप्फिया-जति णं भंते ! समणेणं भगवया जाव संपत्तेणं उवंगाणं दोच्चस्स वग्गस्स कप्पवडिंसियाणं अयमट्ठे पं० तच्चस्स णं भंते ! वग्गस्स पुप्फियाणं उवंगाणं के अट्ठे पं० ?, एवं खलु जंबू । समणेणं जाव संपत्तेणं उवंगाणं तच्चस्स वग्गस्स पुप्फियाणं दस अज्झयणा पं० तं०-‘चंदे सूरु सुक्के बहुपुत्तिय पुन्न

माणिभदे य । दत्ते सिवे बले या अणाडि ए चैव बोद्धव्वे ॥२॥ जइ णं भंते ! समणेणं जाव संपत्तेणं पुप्फियाणं दस अज्झयणा पं० पढमस्स णं भंते ! अज्झयणस्स पुप्फियाणं के अट्ठे पं० ?, एवं खलु जंबू ! तेणं कालेणं० रायगिहे नामं नगरे, गुणसिलए चेइए सेणिए राया, तेणं कालेणं० सामी समोसढे, परिसा निग्गया, तेणं कालेणं० चंदे जोइसिंदे जोइसराया चंदवडिंसए विमाणे सभाए सुहम्माए चंदसि सीहासणंसि चउहिं सामाणियसाहस्सीहिं जाव विहरति, इमं च णं केवलकप्पं जंबुदीवं दीवं विउलेणं ओहिणा आभोएमाणे २ पासति समणं भगवं महावीरं जहा सूरियाभे आभिओगे देवे सद्दवित्ता जाव सुरिंदाभिगमणजोगं करेत्ता तमाणत्तियं पच्चप्पिणंति, सूसरा घंटा, जाव विउव्वणा, नवरं जाणविमाणं जोयणसहस्सविच्छिन्नं अब्बतेवट्ठिजोयणसमूसियं महिंदज्झतो पणुवीसं जोयणमूसितो सेसं जहा सूरियाभस्स जाव आगतो नट्टविही तहेव पडिगतो, भंते ! त्ति भगवं गोयमे समणं भगवं० भंते ! पुच्छा, कूडागारसालादिट्ठंतेण तहेव सरीरं अणुपविट्ठा, पुव्वभवो- एवं खलु गो० ! तेणं कालेणं० सावत्थी नामं नयरी होत्था, कोट्टए चेइए, तत्थ णं सावत्थीए नयरीए अंगती नामं गाहावती होत्था अड्ढे जाव अपरिभूते, तते णं से अंगती गाहावती सावत्थीए नयरीए बहूणं नगरनिगम० जहा आणंदो, तेणं कालेणं० पासे णं अरहा पुरिसादाणीए आदिकरे जहा महावीरो नवुरस्सेहे सोलसहिं समणसाहस्सीहिं अट्ठतीसाए अज्जियासाहस्सीहिं जाव कोट्टते समोसढे, परिसा निग्गया, तते णं से अंगती गाहावती इमीसे कहाए लब्धट्ठे समाणे हट्ठे जहा कत्तिओ सेट्ठी तहा निग्गच्छति जाव पज्जुवासति, धम्मं सोच्चा निसम्मं जं नवरं देवाणुप्पिया ! जेट्ठपुत्तं कुडुंबे ठावेमि तते णं अहं देवाणुप्पियाणं जाव पव्वयामि, जहा गंगदत्तो तहा पव्वतिते जाव गुत्तबंभयारी, तते णं से अंगती अणगारे पासस्स अरहतो तहारूवाणं थेराणं अंतिए सामाइयमाइयाइं एक्कारस अंगाइं अहिज्जति त्ता बहूहिं चउत्थ जाव भावेमाणो विहरइ, बहूइं वासाइं सामन्नपरियागं पाउणति त्ता अब्बमासियाए संलेहणाए तीसं भत्ताइं अणसणाए छेदित्ता किंचिविराहियसामन्ने कालमासे कालं किच्चा चंदवडिंसए विमाणे उववातसभाते देवसयणिज्जंसि देवदूसंतरिए चंदे जोइसिंदत्ताए उववन्ने तते णं से चंदे जोइसराया अहुणोववन्ने समाणे पंचविहाए पज्जत्तीए पज्जत्तीभावं गच्छइ, तंजहा-आहारपज्जत्तीए सरीर० इंदिय० आणपाण० भासामणपज्जत्तीए० भावेमाणे विहरइ, चंदस्स णं भंते ! जोइसिंदस्स जोइसरन्नो केवइयं कालं ठिती पं० ?, गो० ! पलिओवमं वाससयसहस्समम्भहियं, एवं खलु गो० ! चंदस्स जाव जोतिसरन्नो सा दिव्वा देविड्ढी०, चंदे णं भंते ! जोइसिंदे जोइसराया ताओ देवलोगाओ आउक्खएणं० चइत्ता कहिं गच्छिहिति० ?, गो० ! महाविदेहे वासे जाइं कुलाइं० तओ पच्छा संसारभउव्विग्गे सामन्नं पडिवज्जइ कम्मं खवेइ तओ सिज्झिहिति, एवं खलु जंबू ! समणेणं० निक्खेवओ ॥२३॥ चंदज्झयणं १०-१ ॥ जइ णं भंते ! समणेणं भगवया जाव पुप्फियाणं पढमस्स अज्झयणस्स जाव अयमट्ठे पं० दोच्चस्स णं भंते ! अज्झयणस्स पुप्फियाणं समणेणं भगवता जाव संपत्तेणं के अट्ठे पं० ?, एवं खलु जंबू ! तेणं कालेणं० रायगिहे नगरे, गुणसिलए चेइए, सेणिए राया, समोसरणं जहा चंदो तहा सूरूडवि आगओ जाव नट्टविहिं उवदंसित्ता पडिगतो, पुव्वभवपुच्छा, सावत्थी नगरी कोट्टए चेइए सुपतिट्ठे नामं गाहावई होत्था अड्ढे जहेव अंगती जाव विहरति, पासो समोसढो, जहा अंगती तहेव पव्वइए, तहेव विराहिय सामन्ने जाव महाविदेहे वासे सिज्झिहिति जाव अंतं०, एवं खलु जंबू ! समणेणं० निक्खेवओ ॥२४॥ सूरज्झयणं १०-२॥ जइ णं भंते ! समणेणं भगवता जाव संपत्तेणं उक्खेवतो भाणियव्वो, रायगिहे नगरे, गुणसिलए चेइए, सेणिए राया, सामी समोसढे, परिसा निग्गया, तेणं कालेणं० सुक्के महग्गहे सुक्कवडिंसए विमाणे सुक्कंसि सीहासणंसि चउहिं सामाणियसाहस्सीहिं जहेव चंदो तहेव आगओ नट्टविहिं उवदंसित्ता पडिगतो, भंते ! त्ति० कूडागारसाला०, पुव्वभवपुच्छा, एवं खलु गो० ! तेणं कालेणं० वाणारसी नामं नयरी होत्था, तत्थ णं वाणारसीए नयरीए अंबसालवणे, सोमिले नामं माहणे परिवसति अड्ढे जाव अपरिभूते रिउव्वेय जाव सुपरिनिट्ठिते, पासे० समोसढे, परिसा पज्जुवासति, तए णं तस्स सोमिलस्स माहणस्स इमीसे कहाए लब्धट्ठस्स समाणस्स इमे एतारूवे अज्झत्थिए०-एवं खलु पासे अरहा पुरिसादाणीए पुव्वाणुपुव्विं जाव अंबसालवणे विहरति तं गच्छामि णं पासस्स अरहतो अंतिए पाउब्भवामि, इमाइं च णं एयारूवाइं अट्ठाइं हेऊइं जहा पण्णत्तीए सोमिलो निग्गतो खंडियविहूणो जाव एवं वयासी- जत्ता ते भंते ! जवणिज्जं च ते भंते ! पुच्छा सरिसवया मासा कुलत्था एगे भवं जाव संबुद्धे सावगधम्मं पडिवज्जित्ता पडिगते, तते णं पासे अरहा अण्णया कदायी

वाणारसीओ नगरीओ अंबसालवणातो चेइयाओ पडिनिक्खमति ता बहिया जणवयविहारं विहरति, तते णं से सोमिले माहणे अण्णदा कदायि असाहुदंसणेण य अपज्जुवासणताए य मिच्छत्तपज्जवेहिं परिवड्ढमाणेहिं २ सम्मत्तपज्जवेहिं परिहायमाणेहिं २ मिच्छत्तं पडिवन्ने, तते णं तस्स सोमिलस्स माहणस्स अण्णदा कदायि पुव्वरत्तावरत्तकालसमयंसि कुडुंबजागरियं जागरमाणस्स अयमेयारूवे अज्झत्थिए जाव समुप्पज्जित्था-एवं खलु अह वाणारसीए नयरीए सोमिले नामं माहणे अच्चंतमाहणकुलप्पसूए तते णं मए वयाइं चिण्णाइं वेदा य अहीया दारा परिणीया गब्भा आहूया पुत्ता जणिता इड्ढीओ समाणीयाओ पसुवधा कया जन्ना जेड्ढा दक्खिणा दिन्ना अतिही पूजिता अग्गी हूया जूया निक्खित्ता, तं सेयं खलु ममं इदाणिं कल्लं जाव जलंते वाणारसीए नयरीए बहिया बहवे अंबारामा रोवावित्ते, एवं माउलिंगा बिल्ला कविट्ठा चिंचा पुप्फारामा रोवावित्ते, एवं संपेहेति ता कल्लं जाव जलंते वाणारसीए नयरीए बहिया अंबारामे य जाव पुप्फारामे य रोवावेति, तते णं बहवे अंबारामा य जाव पुप्फारामा य अणुपुव्वेणं सारक्खिज्जमाणा संगोविज्जमाणा संवडिडज्जमाणा आरामा जाता किण्हा किण्होभासा जाव रम्मा महामेहनिकुरंबभूता पत्तिया पुप्फिया फलिया हरियगरेरिज्जमाणसिरिया अतीव २ उवसोभेमाणा २ चिट्ठंति, तते णं तस्स सोमिलस्स माहणस्स अण्णदा कदायि पुव्वरत्तावरत्तकालसमयंसि कुडुंबजागरियं जागरमाणस्स अयमेयारूवे अज्झत्थिए जाव समुप्पज्जित्था-एवं खलु अहं वाणारसीए नयरीए सोमिले नामं माहणे अच्चंतमाहणकुलप्पसूते, तते णं मए वयाइं चिण्णाइं जाव जूवा णिक्खित्ता तते णं मए वाणारसीए नयरीए बहिया बहवे अंबारामा जाव पुप्फारामा य रोवाविया, तं सेयं खलु ममं इदाणिं कल्लं जाव जलंते सुबहुं लोहकडाहकडुच्छुयं तंबियं तावसभंडं घडावित्ता विउलं असणं० मित्तनाइ० आमंतित्ता तं मित्तनाइणियणं० विउलेणं असणं० जाव सम्माणित्ता तस्सेव मित्त जाव जेड्ढपुत्तं कुडुंबे ठावेत्ता तं मित्तनाइ जाव आपुच्छित्ता सुबहुं लोहकडाहकडुच्छुयंतंबियतावसभंडं गहाय जे इमे गंगाकूले वाणपत्था तावसा भवंति, तं०-होत्तिया पोत्तिया कोत्तिया जंनती सड्ढती थालती हुंबउट्ठा दंतुक्खलिया उम्मज्जगा संमज्जगा निमज्जगा संपक्खालगा दक्खिणकूला उत्तरकूला संखधमा कूलधमा मियलुद्धया हत्थितावसा उदंडा दिसापोक़्खिणो वक्कवासिणो बिलवासिणो जलवासिणो रूक्खमूलिया अंबूभक्खिणो वायुभक्खिणो सेवालभक्खिणो मूलाहारा कंदाहारा तयाहारा पत्ताहारा पुप्फाहारा फलाहारा बीयाहारा परिसडियकंदमूलतयपत्तपुप्फफलाहारा जलाभिसेयकडिणगायभूता आयावणाहिं पंचग्गितावेहिं इंगालसोल्लियं कंदुसोल्लियंपिव अप्पाणं करेमाणा विहरंति, तत्थ णं जे ते दिसापोक़्खिया तावसा तेसिं अंतिए दिसापोक़्खियतावसत्ताए पव्वइत्ते, पव्वयित्तेऽविय णं समाणे इमं एयारूवं अभिग्गहं अभिगिण्हिस्सामि-कप्पति मे जावज्जीवाए छट्ठंछट्ठेणं अणिक़्खित्तेणं दिसाचक्कवालेणं तवोक़्कमेणं उड्ढं बाहातो पगिज्झिय २ सूराम्भिमुहस्स आतावणभूमीए आतावेमाणस्स विहरित्तएत्तिकट्टु एवं संपेहेइ ता कल्लं जाव जलंते सुबहुं लोह जाव दिसापोक़्खियतावसत्ताए पव्वइए, पव्वइएऽविय णं समाणे इमं एयारूवं अभिग्गहं अभिगिण्हइ ता पढमं छट्ठक्खमणं उवसंपज्जित्ताणं विहरति, तते णं सोमिले माहणे रिसी पढमच्छट्ठक्खमणपारणंसि आयावणभूमीए पच्चोरूहति ता वागलवत्थनियत्थे जेणेव सए उडए तेणेव उवा० ता कठिणसंकाइयं गेण्हति ता पुरच्छिमं दिसिं पुक्खेति-पुरच्छिमाए दिसाए सोमे महाराया पत्थाणे पत्थियं अभिरक्खउ सोमिलमाहणरिसिं, ता जाणि य तत्थ कंदाणि य मूलाणि य तयाणि य पत्ताणि य पुप्फाणि य फलाणि य बीयाणि य हरियाणि य ताणि अणुजाणउत्तिकट्टु पुरच्छिमं दिसं पसरति ता जाणि य तत्थ कंदाणि य जाव हरियाणि य ताइं गेण्हति किडिणसंकाइयं भरेति ता दब्भे य कुसे य पत्तामोडं च समिहाओ य कट्ठाणि य गेण्हति ता जेणेव सए उडए तेणेव उवा० ता किडिणसंकाइयं ठवेति ता वेदिं वड्ढेति ता उवलेवणसंमज्जणं करेति ता दब्भकल (कु) सहत्थगते जेणेव गंगा महानदी तेणेव उवा० ता गंगं महानदीं ओगाहति ता जलमज्जणं करेति ता जलकिड्ढं करेति ता जलाभिसेयं करेति ता आयंतं चोक्खे परमसुइभूए देवपिउकयकज्जे दब्भकल (कु) सहत्थगते गंगातो महानदीओ पच्चुत्तरति ता जेणेव सते उडए तेणेव उवा० ता दब्भे य कुसे य वालुयाए (२२५) य वेदिं रएति ता सरयं करेति ता अरणिं करेति ता सरएणं अरणिं महेति ता अग्गिं पाडेति ता अग्गिं संधुक्केति ता समिहा कट्ठाणि परिक्खिवति ता अग्गिं उज्जालेति ता 'अग्गिस्स दाहिणे पासे, सत्तंगाइं समादहे तं०-सकथं वक्कलं ठाणं, सिज्जं भंडं कमंडलुं ।

दंडदारुं तहप्पाणं, अह ताइं समादहे ॥३॥ मधुणा य घएण य तंदुलेहि य अग्णिं हुणइ, चरुं साधेति ता बलिं वइस्सदेवं करेति ता अतिहिपूयं करेति ता तओ पच्छा अप्पण्णा आहारं आहारेति, तते णं सोमिले माहणरिसी दोच्चं छट्ठक्खमणं० दोच्चंसि छट्ठक्खमणपारणगंसि तं चेव सव्वं भाणियव्वं जाव आहारं आहारेति, नवरं इमं नाणत्तं-दाहिणाए दिसाए जमे महाराया पत्थाणे पत्थियं अभिरक्खउ सोमिलं माहणरिसिं जाणि य तत्थ कंदाणि य जाव अणुजाणउत्तिकट्ठू दाहिणं दिसिं पसरति, एवं पच्चत्थिमेणं वरूणे महाराया जाव पच्चत्थिमं दिसिं पसरति, उत्तरेणं वेसमणे महाराया जाव उत्तरं दिसिं पसरति, पुव्वदिसाणमेणं चत्तारिवि दिसाओ भाणियव्वाओ जाव आहारं आहारेति, तते णं तस्स सोमिलमाहणरिसिस्स अण्णया कयायि पुव्वरत्तावरत्तकालसमयंसि अणिच्चजागरियं जागरमाणस्स अयमेयारूवे अज्झत्थिए जाव समुप्पज्जित्था-एवं खलु अहं वाणारसीए नगरीए सोमिले नामं माहणरिसी अच्चंतमाहणकुलप्पसूए, तते णं मए वयाइं चिण्णाइं जाव जूवा निक्खित्ता, तते णं मए वाणारसीए जाव पुप्फारामा य जाव रोविता, तते णं मम सुबहुलोह जाव घडावित्ता जाव जेट्ठपुत्तं ठावित्ता जाव जेट्ठपुत्तं आपुच्छित्ता सुबहुलोह जाव गहाय मुंडे० पव्वइएऽविय णं समाणे छट्ठंछट्ठेणं जाव विहरति, तं सेयं खलु मम इयाणिं कल्लं जाव जलंते बहवे तावसे दिट्ठाभट्ठे य पुव्वसंगतिए य परियायसंगतिए य आपुच्छित्ता आसमसंसियाणि य बहूइं सत्तसयाइं अणुमाणइत्ता वागलवत्थनियत्थस्स कढिणसंकाइयगहितसभंडोवकरणस्स कट्ठमुद्दाए मुहं बंधित्ता उत्तरदिसाए उत्तराभिमुहस्स महपत्थाणं पत्थावित्ताए, एवं संपेहेति ता कल्लं जाव जलंते बहवे तावसे य दिट्ठाभट्ठे य पुव्वसंगतिते य तं चेव जाव कट्ठमुद्दाए मुहं बंधति ता अयमेतारूवं अभिग्गहं अभिणिग्गहति-जत्थेव णं अहं जलंसि वा थलंसि वा दुग्गंसि वा निन्नंसि वा पव्वतंसि व विसमंसि वा गड्ढाए वा दरीए वा पक्खलिज्ज वा पवडिज्ज वा नो खलु मे कप्पति पच्चुट्ठित्तएत्तिकट्ठू अयमेयारूवं अभिग्गहं अभिणिग्गहति ता उत्तराए दिसाए उत्तराभिमुहं महपत्थाणं पत्थिए, से सोमिले माहणरिसी पुव्वावरणहकालसमयंसि जेणेव असोगवरपायवे तेणेव उवागते, असोगवरपायवस्स अहे कढिणसंकाइयं ठवेति वेदिं वड्ढेइ ता उवलेवणसंमज्जणं करेति ता दब्भकुसहत्थगते जेणेव गंगा महानई जहा सिवो जाव गंगातो महानईओ पच्चुत्तरइ ता जेणेव असोगवरपायवे तेणेव उवा० ता दब्भेहि य कुसेहि य वालुयाए वेदिं रतेति ता सरगं करेति जाव बलिं वइस्सदेवं करेति ता कट्ठमुद्दाए मुहं बंधति ता तुसिणीए संचिट्ठति, तते णं तस्स सोमिलमाहणरिसिस्स पुव्वरत्तावरत्तकालसमयंसि एगे देवे अंतियं पाउब्भूते, तते णं से देवे सोमिलं माहणं एवं वयासी-हंभो सोमिलमाहणा ! पव्वइया दुपव्वइतं ते, तते णं से सोमिले तस्स देवस्स दोच्चंपि तच्चंपि एयमट्ठं नो आढाति नो परिजाणइ जाव तुसिणीए संचिट्ठति, तते णं से देवे सोमिलेणं माहणरिसिणा अणाढाइज्जमाणे० जामेव दिसिं पाउब्भूते तामेव जाव पडिगते, तते णं से सोमिले कल्लं जाव जलंते वागलवत्थनियत्थे कढिणसंकाइयं गहियग्गिहोत्तभंडोवकरणे कट्ठमुद्दाए मुहं बंधति ता उत्तराभिमुहे संपत्थिते, तते णं से सोमिले बितियदिवसम्मि पुव्वावरणहकालसमयंसि जेणेव सत्तिवन्ने० अहे कढिणसंकाइयं ठवेति वेतिं वड्ढेति जहा असोगवरपायवे जाव अग्णिं हुणति कट्ठमुद्दाए मुहं बंधति तुसिणीए संचिट्ठति, तते णं तस्स सोमिलस्स पुव्वरत्तावरत्तकालसमयंसि एगे देवे अंतियं पाउब्भूए, तते णं से देवे अंतलिक्खपडिवन्ने जहा असोगवरपायवे जाव पडिगते, तते णं से सोमिले कल्लं जाव जलंते वागलवत्थनियत्थे कढिणसंकाइयं गेणहति ता कट्ठमुद्दाए मुहं बंधति ता उत्तरहिसाए उत्तराभिमुहे संपत्थिते, तते णं से सोमिले ततियदिवसम्मि पुव्ववरणहकालसमयंसि जेणेव असोगवरपायवे तेणेव उवा० ता असोगवरपायवस्स अहे कढिणसंकाइयं ठवेति वेतिं वड्ढेति जाव गंगं महानइं पच्चुत्तरति ता जेणेव असोगवरपायवे तेणेव उवा० ता वेतिं रएति ता कट्ठमुद्दाए मुहं बंधति ता तुसिणीए संचिट्ठति, तते णं तस्स सोमिलस्स पुव्वरत्तावरत्तकाले एगे देवे अंतियं पाउ० तं चेव भणति जाव पडिगते, तते णं से सोमिले जाव जलंते वागलवत्थनियत्थे कढिणसंकाइयं जाव कट्ठमुद्दाए मुहं बंधति ता उत्तराए दिसाए संपत्थिए, तते णं से सोमिले चउत्थदिवसे पुव्वावरणहकालसमयंसि जेणेव वडपायवे तेणेव उवागते वडपायवस्स अहे कढिण० संठवेति ता वेइं वड्ढेति उवलेवणसंमज्जणं करेति जाव कट्ठमुद्दाए मुहं बंधति० तुसिणीए संचिट्ठति, तते णं तस्स सोमिलस्स पुव्वरत्तावरत्तकाले एगे देवे अंतियं पाउ० तं चेव भणति जाव पडिगते, तते णं से सोमिले जाव जलंते वागलवत्थनियत्थे किढिणसंकाइयं जाव कट्ठमुद्दाए मुहं बंधति ता उत्तराए उत्तराभिमुहे संपत्थिते, तते णं से सोमिले

पंचमदिवसम्मि पुव्वावरणहकालसमयंसि जेणेव उंबरपायवे० उंबरपायवरस्स अहे कढिणसंकाइयं ठवेति वेइं वड्ढेति जाव कट्टमुद्दाए मुहं बंधति जाव तुसिणीए संचिद्धति, तते णं तस्स सोमिलमाहणस्स पुव्वरत्तावरत्तकाले एगे देवे जाव एवं वयासी-हंभो सोमिला ! पव्वइया दुप्पवइयं ते पढमं व भणति तहेव तुसिणीए संचिद्धति, देवो दोच्चंपि तच्चंपि वदति-सोमिला ! पव्वइया दुप्पवइयं ते, तए णं से सोमिले तेणं देवेणं दोच्चंपि तच्चंपि एवं वुत्ते समाणे तं देवं एवं वयासी-कहणं देवाणुप्पिया ! मम दुप्पवइतं ?, तते णं से देवे सोमिलं माहणं एवं वयासी-एवं खलु देवाणुप्पिया ! तुमं पासस्स अरहओ पुरिसादाणीयस्स अंतियं पंचाणुव्वए सत्त सिक्खावए दुवालसविहे सावगधम्मं पडिवन्ने, तए णं तव अण्णदा कदाइ पुव्वरत्त० कुडुंब जाव पुव्वचिंतितं देवो उच्चारेति जाव जेणेव असोगवरपायवे तेणेव उवा० ता कढिणसंकाइयं जाव तुसिणीए संचिद्धसि, तते णं पुव्वरत्तावरत्तकाले तव अंतियं पाउब्भवामि हंभो सोमिला ! पव्वइया दुप्पवइतियं ते तह चेव देवो नियवयणं भणति जाव पंचमदिवसम्मि पुव्वावरणहकालसमयंसि जेणेव उंबरवरपायवे तेणेव उवागते कढिणसंकाइयं ठवेसि वेदिं वड्ढेसि उवलेवणं संमज्जणं करेसि ता कट्टमुद्दाए मुहं बंधसि ता तुसिणीए संचिद्धसि तं एवं खलु देवाणुप्पिया ! तव दुप्पवइयितं, तते णं से सोमिले तं देवं एवं वयासी-कहणं देवाणुप्पिया ! मम सुप्पवइतं ?, तते णं से देवे सोमिलं एवं वयासी-जइ णं तुमं देवाणुप्पिया ! इयाणिं पुव्वपडिवण्णाइं पंचअणुवयाइं० सयमेव उवसंपज्जित्ताणं विहरसि तो णं तुज्झ इदाणिं सुपव्वइयं भविज्जा, तते णं से देवे सोमिलं वंदति नमंसति ता जामेव दिसिं पाउब्भूते जाव पडिगते, तते णं सोमिले माहणरिसी तेणं देवेणं एवं वुत्ते समाणे पुव्वपडिवन्नाइं पंच अणुव्वयाइं सयमेव उवसंपज्जित्ताणं विहरति, तते णं से सोमिले बहूहिं चउत्थछट्टट्टमजावमासद्धमासखमणेहिं विचित्तेहिं तवोवहाणेहिं अप्पाणं भावेमाणे बहूइं वासाइं समणोवासगपरियागं पाउणति ता अब्बमासियाए संलेहणाए अत्ताणं झूसेति ता तीसं भत्ताइं अणसणाए छेदेति ता तस्स ठाणस्स अणालोइयपडिक्कंते विराहियसम्मत्ते कालमासे कालं किच्चा सुक्कवडिंसए विमाणे उववातसभाए देवसयणिज्जंसि जाव ओगाहणाए सुक्कमंहग्गहत्ताए उववन्ने. तते णं से सुक्के महग्गहे अहुणोववन्ने समाणे जाव भासामणपज्जतीए०, एवं खलु गो० ! सुक्केणं महग्गहेणं सा दिव्वा जाव अभिसमन्नागया, एणं पलिओवमं ठिती, सुक्के णं भंते ! महग्गहे तातो देवलोगाओ आउक्खएणं० कहिं ग० ?, गो० ! महाविदेहे वासे सिज्झिहिति०, एवं खलु जंबू ! समणेणं० निक्खेवओ । २५॥ सुक्कज्झयणं १०-३॥ जइ णं भंते ! उक्खेवओ, एवं खलु जंबू ! तेणं कालेणं० रायगिहे नामं नगरे. गुणसिलए चेइए, सेणिए राया, सामी समोसढे, परिसा निग्गया, तेणं कालेणं० बहुपुत्तिया देवी सोहम्मं कप्पे बहुपुत्तिए विमाणे सभाए सुहम्मए बहुपुत्तियंसि सीहासणंसि चउहिं सामाणियसाहस्सीहिं चउहिं महत्तरियाहिं जहा सूरियाभे जाव भुंजमाणी विहरइ. इमं च णं केवलकप्पं जंबुदीवं दीवं विउलेणं ओहिणा आभोएमाणी २ पासति समणं भगवं महावीरं जहा सूरियाभो जाव णमंसित्ता सीहासणवरंसि पुरत्थाभिमुहा सन्निसन्ना. आभियोगा जहा सूरियाभस्स, सूसरा घंटा. आभिओगियं देवं सद्दावेइ, जाणविमाणं वण्णओ जाव उत्तरिल्लेणं निज्जाणमग्गेणं जोयणसयसाहस्सिएहिं विग्गहेहिं आगता जहा सूरियाभे. धम्मकहा समत्ता, तते णं सा बहुपुत्तिया देवी दाहिणं भुयं पसारेइ देवकुमाराणं अट्टसयं० देवकुमारियाणं य वामाओ भुयाओ अट्टसयं तयाणंतरं च णं बहवे दारगा य दारियाओ य डिंभए य डिंभियाओ य विउव्वइ, नट्टविहिं जहा सूरियाभो उवदंसित्ता पडिगते, भंते ! त्ति भयवं गोयमे समणं भगवं महावीरं वंदइ नमंसति० कूडागारसाला, बहुपुत्तियाए णं भंते ! देवीए सा दिव्वा देविड्ढी पुच्छा जाव अभिसमण्णागता ?, एवं खलु गो० ! तेणं कालेणं० वाणारसी नामं नगरी, अंबसालवणे चेइए, तत्थ णं वाणारसीए नगरीए भद्दे नामं सत्थवाहे होत्था अड्ढे अपरिभूते, तस्स णं भद्दस्स सुभद्दा नामं भारिया सुकुमाला वंझा अवियाउरी जाणुकोप्परमाता यावि होत्था, तते णं तीसे सुभद्दाए सत्थवाहीए अन्नया कयाइ पुव्वरत्तावरत्तकाले कुडुंबजागरियं० इमेयारूवे जाव संकप्पे समुप्पज्जित्था-एवं खलु अहं भद्देणं सत्थवाहेणं सद्धिं विउलाइं भोगभोगाइं भुंजमाणी विहरामि. नो चेव णं अहं दारगं वा दारियं वा पयामि, तं धन्नाओ णं ताओ अम्मगाओ सुलद्धे जाव णं तासिं अम्मगाणं मणुयजम्मजीवितफले जासिं मन्ने नियकुच्छिसंभूयगाइं थणदुद्धलुद्धगाइं महुरसमुल्लावगाणि मंजुलमम्मणप्पजंपिताणि थणमूलकक्खदेसभागं अभिसरमाणगाणि पण्हयंति, पुणो य कोमलकमलोवमेहिं हत्थेहिं गिण्हिऊणं उच्छंगनिवेसियाणि देति समुल्लावए

सुमहुरे पुणो २ मम्मणमंजुलप्पभणिए, अहं णं अधण्णा अपुण्णा अकयपुण्णा एत्तो एगमवि न पत्ता ओहयं जाव झियाइ, तेणं कालेणं सुव्वतातो णं अज्जातो ईरियासमितातो भासासमितातो एसणासमितातो आयाणभंडमत्तनिकखेवणासमितातो उच्चारपासवणखेलजल्लसिंघाणपारिद्धावणियासमियातो मणगुत्ताओ वयगुत्ताओ कायगुत्ताओ गुत्तिंदियाओ गुत्तबंभयारिणीओ बहुस्सुयाओ बहुपरिवारातो पुव्वाणुपुव्विं चरमाणीओ गामाणुगामं दूइज्जमाणीओ जेणेव वाणारसी नगरी तेणेव उवागयातो अहापडिरूवं उग्गहं उग्गिण्हित्ता संजमेणं तवसां विहरति, तते णं तासिं सुव्वयाणं अज्जाणं एगे संघाडए वाणारसीनगरीए उच्चनीयमज्झिमाइं कुलाइं घरसमुदाणस्स भिक्खायरियाए अडमाणे भद्दस्स सत्थवाहस्स गिहं अणुपविट्ठे, तते णं सुभद्दा सत्थवाही तातो अज्जातो एज्जमाणीओ पासति ता हट्ठं खिप्पामेव आसणाओ अब्भुट्ठेति ता सत्तट्ठ पयाइं अणुगच्छइ ता वंदइ नमंसइ ता विउलेणं असणपाणखाइमसाइमेणं पडिलाभित्ता एवं वयासी-एवं खलु अहं अज्जाओ ! भद्देणं सत्थवाहेणं सद्धिं विउलाइं भोगभोगाइं भुंजमाणी विहरामि, नो चेव णं अहं दारगं वा दारियं वा पयामि. तं धन्नाओ णं ताओ अम्मगाओ जाव एत्तो एगमवि न पत्ता, तं तुब्भे अज्जाओ ! बहुणायातो बहुपढियातो बहूणि गामागरनगरजावसणिवेसाइं आहिंदह बहूणं राईसरतलवरजावसत्थवाहप्पभित्तीणं गिहाइं अणुपविसह, अत्थि से केति कहिंचि विज्जापओए वा मंतप्पओए वा वमणं वा विरेयणं वा बत्थिकम्मं वा ओसहे वा भेसज्जे वा उवलद्धे जेणं अहं दारगं वा दारियं वा पयाएज्जा ?, तते णं ताओ अज्जाओ सुभद्दं सत्थवाहिं एवं वयासी-अम्हे णं देवाणुप्पिए ! समणीओ निगंथीओ ईरियासमियाओ जाव गुत्तबंभचारिणीओ, नो खलु कप्पति अम्हं एयमट्ठं कण्णेहिवि णिसामित्तए, किमंग पुण उद्दिस्सित्तए वा समायरित्तए वा ? अम्हे णं देवाणुप्पिए ! णवरं तव विचित्तं केवलपण्णत्तं धम्मं परिकहेमो, तते णं सुभद्दा सत्थवाही तासिं अज्जाणं अंतिए धम्मं सोच्चा निसम्म हट्ठतुट्ठा तातो अज्जातो तिक्रुत्तो वंदति नमंसति ता एवं वदासी-सद्धहामि णं अज्जाओ ! निगंथं पावयणं पत्तियामिं रोएमि णं अज्जाओ निगंथीओ ! एवमेयं तहमेयं अवितहमेयं जाव सावगधम्मं पडिवज्जए, अहासुहं देवां ! मा पडिबंधं, तते णं सा सुभद्दा सत्थवाही तासिं अज्जाणं अंतिए जाव पडिवज्जति ता तातो अज्जातो वंदइ नमंसइ ता पडिविसज्जति, तते णं सुभद्दा सत्थवाही समणोवासिया जाया जाव विहरति, तते णं तीसे सुभद्दाए समणोवासियाए अण्णदा कदायि पुव्वरत्तावरत्तकाले कुडुंबं अयमेयारूवे जाव समुप्पज्जित्था-एवं खलु अहं भद्देणं सत्थं विउलाइं भोगभोगाइं जाव विहरामि नो चेव णं अहं दारगं वा जाव विहरामि तं सेयं खलु ममं कल्लं जाव जलंते भद्दं सत्थवाहं आपुच्छित्ता सुव्वयाणं अज्जाणं अंतिए अज्जा भवित्ता अगाराओ जाव पव्वइत्तए, एवं संपेहेति ता कल्ले जेणेव भद्दे सत्थवाहे तेणेव उवागता करतलं एवं वयासी-एवं खलु अहं देवाणुप्पिया ! तुब्भेहिं सद्धिं बहूहिं वासाइं विउलाइं भोग जाव विहरामि, नो चेव णं दारगं वा दारियं वा पयामि, तं इच्छामि णं देवाणुप्पिया ! तुब्भेहिं अणुण्णाया समाणी सुव्वयाणं जाव पव्वइत्तए, तते णं से भद्दे सत्थवाहे सुभद्दं सत्थवाहिं एवं वदासी-मा णं तुमं देवाणुप्पिया ! इदाणिं मुंडा जाव पव्वयाहि, भुंजाहि ताव देवाणुप्पिए ! मए सद्धिं विउलाइं भोगभोगाइं, ततो पच्छा भुत्तभोई सुव्वयाणं अज्जाणं जाव पव्वयाहि, तते णं सुभद्दा समणोवासिया भद्दस्स एयमट्ठं नो आढाति नो परिजाणति दुच्चंपि तच्चंपि सुभद्दा समणों भद्दं एवं वदासी-इच्छामि णं देवाणुप्पिया ! तुब्भेहिं अब्भणुण्णाया समाणी जाव पव्वइत्तए, तते णं से भद्दे सत्थं जाहे नो संचाएति बहूहिं आघवणाहि य एवं पन्नवणाहिं सण्णवणाहिं विण्णवणाहि य आघवित्तए वा जाव विण्णवित्तए वा ताहे अकामते चेव सुभद्दाए निक्खमणं अणुमणित्था, तते णं से भद्दे विउलं असणं उवक्खडावेति, मित्तनातिं ततो पच्छा भोयणवेलाए जाव मित्तनातिं सक्कारेति सम्माणेति, सुभद्दं सत्थवाहिं ण्हायं जाव पायच्छित्तं सव्वालंकारविभूसियं पुरिससहस्सवाहिणिं सीयं दुरूहेति, ततो सा सुभद्दा मित्तनाइ जाव सद्धिं, संपरिवुडा सव्विडिडीए जाव रवेणं वाणारसीनगरीए मज्झिमज्झेणं जेणेव सुव्वयाणं अज्जाणं उवस्सए तेणेव उवां ता पुरिससहस्सवाहिणिं सीयं ठवेति, सुभद्दा सीयातो पच्चोरूहति, तते णं भद्दे सत्थवाहे सुभद्दं सत्थवाहिं पुरतो काउं जेणेव सुव्वया अज्जा तेणेव उवां सुव्वयाओ अज्जाओ वंदति नमंसति ता एवं वदासी-एवं खलु देवाणुप्पिया ! सुभद्दा सत्थवाही ममं भारिया इट्ठा कंता जाव मा णं वातिता पित्तिया सिंभिया सन्निवातिया विविहा रोयातंका फुसंतु, एस णं देवाणुप्पिया ! संसारभउव्विग्गा भीया जम्मणमरणाणं देवाणुप्पियाणं अंतिए मुंडा भवित्ता जाव पव्वयति, तं एयं णं

अहं देवाणुप्पियाणं सीसिणीभिकखं दलयामि, पडिच्छंतु णं देवाणुप्पिया ! सीसिणीभिकखं, अहासुहं देवाणुप्पिया ! मा पडिबंधं करेह, तते णं सा सुभद्दा सुव्वयाहिं अज्जाहिं एवं वुत्ता समाणी हट्ठा० सयमेव आभरणमल्लालंकारं ओमुयइ ता सयमेव पंचमुट्ठियं लोयं करेति ता जेणेव सुव्वयातो अज्जाओ तेणेव उवा० ता सुव्वयाओ अज्जाओ तिकखुत्तो आयाहिणपयाहिणं० वंदइ नमंसइ ता एवं वदासी-आलित्ते णं भंते ! लोए पलित्ते णं भंते ! लोए० जहा देवाणंदा तहा पव्वइता जाव अज्जा जाया जाव गुत्तबंधमारिणी, तते णं सा सुभद्दा अज्जा अन्नदा कदायि बहुजणस्स चेडरूवे संमुच्छिता जाव अज्झोववण्णा अब्भंगणं च उव्वट्ठणं च फासुयपाणं च अलत्तणं च कंकणाणि य अंजणं च वण्णणं च चुण्णणं च खेल्लगाणि य खज्जल्लगाणि य खीरं च पुप्फाणि य गवेसति ता बहुजणस्स दारए य दारियाओ य कुमारे य कुमारियाओ य डिंभए य डिंभियाओ य अप्पेगतिआओ अब्भंगेति अप्पे० उव्वट्ठेति एवं अप्पे० फासुयपाणएणं ण्हावेति अप्पेगइयाणं पाए रयति अप्पे० उड्ढेति अप्पे० अच्छीणि अंजेति अप्पे० उसुए करेति अप्पे० तिलए करेति अप्पे० दिगिंदलए करेति अप्पे० पंतियाओ करेति अप्पे० छिज्जाइं करेति अप्पेगइए वन्नएणं समालभइ अप्पे० चुन्नएणं समालभइ अप्पे० खेल्लणगाइं दलयति अप्पे० खज्जल्लगाइं दलयति अप्पे० खीरभोयणं भुंजावेति अप्पे० पुप्फाइं ओमुयइ अप्पे० पादेसु ठवेति अप्पे० जंघासु करेइ एवं ऊरुसु उच्छंगे कडीए पिट्ठे उरसि खंधे सीसे अ करतलपुडेणं गहाय हलउलेमाणी २ आगायमाणी २ परिहायमाणी २ पुत्तपिवासं च धूयपिवासं च नत्तुयपिवासं च नत्तुइपिवासं च पच्चणुब्भवमाणी विहरति, तते णं तातो सुव्वयातो अज्जाओ सुभदं अज्जं एवं वयासी-अम्हे णं देवाणुप्पिए ! निग्गंथीओ ईरियासमियातो जाव गुत्तबंधमारिणीओ नो खलु अम्हं कप्पति जातकम्मं करित्तए, तुमं च णं देवाणु० बहुजणस्स चेडगरूवे संमुच्छिया जाव अज्झोववण्णा अब्भंगणं जाव नत्तुइपिवासं च पच्चणुब्भवमाणी विहरसि, तं णं तुमं देवाणुप्पिया ! एयस्स ठाणस्स आलोएहि जाव पच्छित्तं पडिवज्जाहि, तते णं सा सुभद्दा अज्जा सुव्वयाणं अज्जाणं एयमट्ठं नो आढाति नो परिजाणति, अणाढायमाणी अपरिजाणमाणी विहरति, तते णं तातो समणीओ निग्गंथीओ सुभदं अज्जं हीलेति निंदंति खिंसंति गरहंति अभिकखणं २ एयमट्ठं निवारंति, तए णं सुभद्दाए अज्जाए समणीहिं निग्गंथीहिं हीलिज्जमाणीए जाव अभिकखणं २ एयमट्ठं निवारिज्जमाणीए अयमेयारूवे अज्झत्थिए जाव समुप्पज्जित्था-जया णं अहं अगारवासं वसामि तया णं अहं अप्पवसा, जप्पभिइं च णं अहं मुंडा भवित्ता आगाराओ अणगारियं पव्वइता तप्पभिइं च णं अहं परवसा, पुव्विं च णं ममं समणीओ निग्गंथीओ आढंति परिजाणंति, इयाणिं नो आढाइंति नो परिजाणंति, तं सेयं खलु मे कल्लं जाव जलंते सुव्वयाणं अज्जाणं अंतियाओ पडिनिक्खमित्ता पाडिएक्कं उवस्सयं उवसंपज्जित्ताणं विहरित्तए, एवं संपेहेति ता कल्लं जाव जलंते सुव्वयाणं अज्जाणं अंतियातो पडिनिक्खमेति ता पाडियक्कं उवस्सयं उवसंपज्जित्ताणं विहरति, तते णं सा सुभद्दा अज्जा अज्जाहिं अणोहट्ठिया अणिवारिता सच्छंदमती बहुजणस्स चेडरूवे संमुच्छिता जाव अब्भंगणं च जाव नत्तिपिवासं च पच्चणुब्भवमाणी विहरति, तते णं सा सुभद्दा अज्जा पासत्था पासत्थविहारी एवं ओसण्णा० कुसीला० संसत्ता० अहाच्छंदा अहाच्छंदविहारी बहूइं वासाइं सामन्नपरियाणं पाउणति ता अब्भमासियाए संलेहणाए अत्ताणं झूसेत्ता तीसं भत्ताइं अणसणे छेदित्ता तस्स ठाणस्स अणालोइयप्पडिक्कंता कालमासे कालं किच्चा सोहम्मे कप्पे बहुपुत्तियाविमाणे उववायसभाए देवसयणिज्जंसि देवदूसंतरिया अंगुलस्स असंखेज्जभागमेत्ताए ओगाहणाए बहुपुत्तियदेवित्ताए उववण्णा, तेणं सा बहुपुत्तिया देवी अहुणोववन्नमित्ता समाणी पंचविहाए पज्जत्तीए जाव भासामणपज्जत्तीए०, एवं खलु गो० ! बहुपुत्तियाए देवीए सा दिव्वा देविड्ढी जाव अभिसमण्णागता, से केणट्ठेणं भंते ! एवं वुच्चइ-बहुपुत्तिया देवी २ ?, गो० ! बहुपुत्तिया णं देवी जाहे २ सक्कस्स देविंदस्स देवरणो उवत्थाणियं करेइ ताहे २ बहवे दारए य दारियाओ य डिंभए य डिंभियातो य विउव्वइ ता जेणेव सक्के देविदे देवराया तेणेव उवा० ता सक्कस्स देविंदस्स देवरणो दिव्वं देविड्ढि दिव्वं देवज्जुइं दिव्वं देवाणुभागं उवदंसेति, से तेणट्ठेणं गो० ! एवं वुच्चति-बहुपुत्तिया देवी २. बहुपुत्तियाणं भंते ! देवीणं केवइयं कालं ठिती पं० ?, गो० ! चत्तारि पलिओवमाइं ठिई पं०, बहुपुत्तिया णं भंते ! देवी तातो देवलोगाओ आउक्खएणं ठितिकखएणं भवक्खएणं अणंतरं चयं चइत्ता कहिं गच्छिहिति कहिं उववज्जिहिति ?. गो० ! इहेव जंबुद्वीवे दीवे भारहे वासे विंझगिरिपायमूले बिभेलसंनिवेसे माहणकुलंसि दारियत्ताए पच्चायाहिति, तते

णं तीसे दारियाए अम्मापियरो एक्कारसमे दिवसे वितिकंते जाव बारसेहिं दिवसेहिं वितिकंतेहिं अयमेयारूवं नामधिज्जं करेति-होउ णं अम्हं इमीसे दारियाए नामधिज्जं सोमा, तते णं सा सोमा उम्मुक्कबालभावा विण्णतपरिणयमेत्ता जोव्वणगमणुपत्ता रूवेण य जोव्वणेण य लाव्वणेण य उक्किट्ठा उक्किट्ठसरीरा जाव भविस्सति, तते णं तं सोमं दारियं अम्मापियरो उम्मुक्कबालभावं विण्णयपरिणयमित्तं जोव्वणगमणुपत्तं पडिकुविणं सुक्केणं नियगस्स भायणिज्जस्स रट्ठकूडस्स भारियत्ताए दलयिस्सति, सा णं तस्स भारिया भविस्सति इट्ठा कंता जाव भंडकरंडगस माणा तिल्लकेलाइव सुसंगोविया चेलपेलाइव सुसंपरिगहिता रयणकरंडगतोविव सुसारक्खिया सुसंगोविता मा णं सीयं जाव विविहा रोयातंका फुसंतु, तते णं सा सोमा माहणी रट्ठकूडेणं सद्धिं विउलाइं भोगभोगाइं भुंजमाणी संवच्छरे २ जुयलगं पयायमाणी सोलसहिं संवच्छरेहिं बत्तीसं दारगरूवे पयाहिति, ततेणं सा सोमा माहणी तेहिं बहूहिं दारगेहिं य दारियाहि य कुमारएहि य कुमारियाहिं य डिंभएहि य डिंभियाहि य अप्पेगइएहिं उत्ताणसेज्जएहिं य अप्पे० थणपाएहि य अप्पे० पीहगपाएहिं अप्पे० परंगणएहिं अप्पे० पक्कममाणेहिं अप्पे० पक्खालणएहिं अप्पे० थणं मग्गमाणेहिं अप्पे० खीरं मग्गमाणेहिं अप्पे० खिल्लणयं मग्गमाणेहिं अप्पे० खज्जगं मग्गमाणेहिं अप्पे० कूरं मग्गमाणेहिं पाणियं मग्गमाणेहिं हसमाणेहिं रूसमाणेहिं अक्कोसमाणेहिं हणमाणेहिं विप्पलायमाणेहिं अणुगम्ममाणेहिं रोवमाणेहिं कंदमाणेहिं विलवमाणेहिं कूवमाणेहिं उक्कूवमाणेहिं निदायमाणेहिं पयलायमाणेहिं हदमाणेहिं वममाणेहिं छेरमाणेहिं मुत्तमाणेहिं मुत्तपुरीसवमियसुलित्तोवलित्ता मइलवसणपच्चडा (दुव्वला) जाव असुई वीभच्छा परमदुग्गंधा नो संचाएइ रट्ठकूडेणं सद्धिं विउलाइं भोगभोगाइं भुंजमाणी विहरित्तए, तते णं से सोमाए माहणीए अण्णया कयाइ पुव्वरत्तावरत्तकालसमयंसि कुडुंबजागरियं जागरमाणीए अयमेयारूवे जाव समुप्पज्जित्था-एवं खलु अहं इमेहिं बहूहिं दारगेहि य जाव डिंभियाहि य अप्पेगइएहिं उत्ताणसेज्जएहिं य जाव अप्पेगइएहिं मुत्तमाणेहिं दुज्जाएहिं दुज्जम्मएहिं हयविप्पहयभग्गेहिं एगप्पहारपडिएहिं जेणं मुत्तपुरीसवमियसुलित्तोवलित्ता जाव परमदुब्धिगंधा नो संचाएमि रट्ठकूडेण सद्धिं जाव भुंजमाणी विहरित्तए, तं धन्नाओ णं ताओ अम्मयाओ जाव जीवियफले जाओ णं वंझाओ अवियाउरीओ जाणुकोप्परमायाओ सुरभिसुगंधगंधियाओ विउलाइं माणूसगाइं भोगभोगाइं भुंजमाणीओ विहरंति, अहं णं अधन्ना अपुण्णा अकयपुण्णा नो संचाएमि रट्ठकूडेण सद्धिं विउलाइं जाव विहरित्तए, तेणं कालेणं० सुव्वयाओ नाम अज्जाओ ईरियासमियाओ जाव बहुपरिवाराओ पुव्वाणुपुव्विं जेणेव बिभेले संनिवेसे अहापडिरूवं ओग्गहं जाव विहरति, तते णं तासिं सुव्वयाणं अज्जाणं एगे संघाडए बिभेले सन्निवेसे उच्चनीय जाव अडमाणे रट्ठकूडस्स गिहं अणुपविट्ठे, तते णं सा सोमा माहणी ताओ अज्जाओ एज्जमाणीओ पासति ता हट्ठ० खिप्पामेव आसणाओ अब्भुट्ठेति ता सत्तट्ठ पयाइं अणुगच्छति ता वंदइ नमंसइ ता विउलेणं असण० पडिलाभित्ता एवं वयासी-एवं खलु अहं अज्जाओ ! रट्ठकूडेणं सद्धिं विउलाइं जाव संवच्छरे २ जुगलं पयामि, सोलसहिं संवच्छरेहिं बत्तीसं दारगरूवे पयाया, तते णं अहं तेहिं बहूहिं दारएहि य जाव डिंभियाहि य अप्पेगतिएहिं उत्ताणसिज्जएहिं जाव मुत्तमाणेहिं दुज्जातेहिं जाव नो संचाएमि विहरित्तए, तमिच्छामि णं अज्जाओ अहं तुम्हं अंतिए धम्मं निसामित्तए, तते णं तातो अज्जातो सोमाते माहणीए विचित्तं केवलपण्णत्तं धम्मं परिकहेति, तते णं सा सोमा माहणी तासिं अज्जाणं अंतिए धम्मं सोच्चा निसम्म हट्ठजावहियया तातो अज्जाओ वंदइ नमंसइ ता एवं वयासी-सद्धहामि णं अज्जाओ ! निग्गंथं पावयणं जाव अब्भुट्ठेमि णं अज्जातो निग्गंथं पावयणं एवमेयं अज्जातो ! जाव से जहेयं तुब्भे वयह जं नवरं अज्जातो ! रट्ठकूडं आपुच्छामि तते णं अहं देवाणुप्पियाणं अंतिए मुंडा जाव पव्वयामि, अहासुहं देवाणुप्पिए ! मा पडिबंधं०, तते णं सा सोमा माहणी तातो अज्जातो वंदइ० ता पडिविसज्जेति, तते णं सा सोमा माहणी जेणेव रट्ठकूडे तेणेव उवागता करतल एवं वयासी-एवं खलु मए देवाणुप्पिया ! अज्जाणं अंतिए धम्मे निसंते सेऽविय णं धम्मे इच्छिते जाव अभिरुचिते, तते णं अहं देवाणुप्पिया ! तुब्भेहिं अब्भणुत्ताया सुव्वयाणं अज्जाणं जाव पव्वइत्तए, तते णं से रट्ठकूडे सोमं माहणिं एवं वयासी-मा णं तुमं देवाणुप्पिए ! इदाणिं मुंडा भवित्ता जाव पव्वयाहि, भुंजाहि ताव देवाणुप्पिए ! मए सद्धिं विउलाइं भोगभोगाइं. ततो पच्छा भुत्तभोई सुव्वयाणं अज्जाणं अंतिए मुंडा जाव पव्वयाहि, तते णं सा सोमा माहणी रट्ठकूडस्स एयमट्ठं पडिसुणेति, तते णं सा सोमा माहणी ण्हाया जाव सरीरा चेडियाचक्कवालपरिकिण्णा साओ गिहाओ पडिनिक्खमति ता बिभेलं संनिवेसं

मज्झिमज्झेणं जेणेव सुव्वयाणं अज्जाणं उवस्सए तेणेव उवा० ता सुव्वयाओ अज्जाओ वंदइ नमंसइ ता पज्जुवासइ, तते णं ताओ सुव्वयाओ अज्जाओ सोमाए माहणीए विचित्तं केवलिपण्णत्तं धम्मं परिकहेति जहा जीवा बज्झंति०, तते णं सा सोमा माहणी सुव्वयाणं अज्जाणं अंतिए जाव दुवालसविहं सावगधम्मं पडिवज्जइ त्त सुव्वयाओ अज्जाओ वंदइ नमंसइ ता जामेव दिसं पाउब्भूआ तामेव दिसं पडिगता, तते णं सा सोमा माहणी समरोवासिया जाया अभिगत जाव अप्पाणं भावेमाणी विहरति, तते णं ताओ सुव्वयाओ अज्जाओ अण्णदा कदाई बिभेलाओ संनिवेसाओ पडिनिक्खमंति. बहिया जणवयविहारं विहरंति, तते णं ताओ सुव्वयाओ अज्जाओ अण्णदा कदायि पुव्वाणु० जाव विहरंति, तते णं सा सोमा माहणी इमीसे कहाए लद्धट्ठा समाणी हट्ठा० ण्हाया तहेव निग्गया जाव वंदइ नमंसइ ता धम्मं सोच्चा जाव नवरं रट्ठकूडं आपुच्छामि तते णं पव्वयामि, अहासुहं०, तते णं सा सोमा माहणी सुव्वयं अज्जं वंदइ नमंसइ ता सुव्वयाणं अंतियाओ पडिनिक्खमइ ता जेणेव सए गिहे जेणेव रट्ठकूडे तेणेव उवा० ता करतलपरिग्गहियं० तहेव आपुच्छइ जाव पव्वइत्तए, अहासुहं देवाणुप्पिए ! मा पडिबंधं०, तते णं रट्ठकूडे विउलं असणं तहेव जाव पुव्वभवे सुभद्दा जाव अज्जा जाता ईरियासमिता जाव गुत्तबंभयारिणी, तते णं सा सोमा अज्जा सुव्वयाणं अज्जाणं अंतिए सामाइयमाइयाइं एक्कारस अंगाइं अहिज्जइ ता बहूहिं चउत्थछट्ठमदसमदुवालस जाव भावेमाणी बहूइं वासाइं सामण्णपरियागं पाउणति ता मासियाए संलेहणाए सट्ठिं भत्ताइं अणसणाए छेदित्ता आलोइयपडिक्कंता समाहिपत्ता कालमासे कालं किच्चा सक्कस्स देविंदस्स देवरण्णो सामाणियदेवत्ताए उववज्जिहिति, तत्थ णं अत्थेगइयाणं देवाणं दो सागरोवमाइं ठिई पं०, तत्थ णं सोमस्सवि देवस्स दो सागरोवमाइं ठिई पं०, से णं भंते ! सोमे देवे तातो देवलोगाओ आउक्खएणं जाव चयं चइत्ता कहिं गच्छिहिति ० ? . गो० ! महाविदेहे वासे जाव अंतं काहिति, एवं खलु जंबू ! समणेणं जाव संपत्तेणं अयमट्ठे पं० । २६॥ बहुपुत्तिअज्झयणं १०-४ ॥ जइ णं भंते ! समणेणं भगवया उक्खेवओ. एवं खलु जंबू ! तेणं कालेणं० रायगिहे नामं नगरे. गुणसिलए चेइए, सेणिए राया. सामी समोसरिते, परिसा निग्गया, तेणं कालेणं० पुण्णभद्दे देवे सोहम्मए कप्पे पुण्णभद्दे विमाणे सभाए सुहम्मए पुण्णभद्दंसि सीहासणंसि चउहिं सामाणियसाहस्सीहिं जहा सूरियाभो जाव बत्तीसतिविहं नट्ठविहिं उवदंसित्ता जामेव दिसिं पाउब्भूते तामेव दिसिं पडिगते, कूडागारसाला०, पुव्वभवपुच्छा, एवं गो० ! तेणं कालेणं० इहेव जंबुदीवे भारहे वासे मणिवइया नामं नगरी होत्था रिद्धं०, चंदोतारणे चेइए, तत्थ णं मणिवइयाए नगरीए पुण्णभद्दे नामं गाहावई परिवसति अइडे०, तेणं कालेणं० थेरा भगवंतो जाति संपण्णा जाव जीवियासमरणभयविप्पमुक्का बहुस्सुया बहुपरियारा पुव्वाणुपुव्विं जाव समोसढा, परिसा निग्गया, तते णं से पुण्णभद्दे गाहावई इमीसे कहाए लद्धट्ठे समाणे हट्ठा० जहा पण्णत्तीए गंगदत्ते तहेव निग्गच्छइ जाव निक्खंतो जाव गुत्तबंभचारी, तते णं से पुण्णभद्दे अणगारे तहारूवाणं थेराणं भगवंताणं अंतिए सामाइयमादियाइं एक्कारस अंगाइं अहिज्जइ ता बहूहिं चउत्थछट्ठम जाव भावित्ता बहूइं वासाइं सामण्णपरियागं पाउणति ता मासियाए संलेहणाए सट्ठिं भत्ताइं अणसणाए छेदित्ता आलोइयपडिक्कंते समाहिपत्ते कालमासे कालं किच्चा सोहम्मए कप्पे पुण्णभद्दविमाणे उववातसभाते देवसयणिज्जंसि जाव भासामणपज्जत्तीए०, एवं खलु गो० ! पुण्णभद्देणं देवेणं सा दिव्वा देविड्ढी जाव अभिसमण्णागता, पुण्णभद्दस्स णं भंते ! देवस्स केवइयं कालं ठिई पं० ? , गो० ! दो सागरोवमाइं ठिई पं०, पुण्णभद्दे णं भंते ! देवे तातो देवलोगातो जाव कहिं गच्छिहिति० ? . गो० ! महाविदेहे वासे सिज्झिहिति जाव अंतं काहिति, एवं खलु जंबू ! समणेणं भगवता जाव संपत्तेणं निक्खेवओ । २७॥ पुण्णभद्दज्झयणं १०-५॥ जइ णं भंते ! समणेणं भगवया जाव संपत्तेणं उक्खेवओ. एवं खलु जंबू ! तेणं कालेणं० रायगिहे नगरे, गुणसिलए चेइए, सेणिए (२२६) राया, सामी समोसरिते, तेणं कालेणं० माणिभद्दे देवे सभाए सुहम्मए माणिभद्दंसि सीहासणंसि चउहिं सामाणियसाहस्सीहिं जहा पुण्णभद्दो तहेव आगमणं नट्ठविही, पुव्वभवपुच्छा मणिवई नगरी माणिभद्दे गाहावई थेराणं अंतिए पव्वज्जा एक्कारस अंगाइं अहिज्जति बहूइं वासाइं परियातो मासिया संलेहणा सट्ठिं भत्ताइं० माणिभद्दे विमाणे देवत्ताए उववातो, दो सागरोवमाइं ठिई, महाविदेहे वासे सिज्झिहिति०, एवं खलु जंबू ! निक्खेवओ ॥ माणिभद्दज्झयणं १०-६ ॥ एवं दत्ते सिवे बले अणाढिते सव्वे जहा पुण्णभद्दे देवे, सव्वेसिं दो सागरोवमाइं ठिती, विमाणा देवसरिसनामा, पुव्वभवे दत्ते चंदणाणामए सिवे मिहिलाए बलो हत्थिणापुरे नगरे अणाढिते काकंदिते चेइयाइं

जहा संगहणीए ।२८॥३ वग्गो ७-१०॥ पुप्फिया समत्ता १० ॥ श्रीपुप्फचूलिया-जइ णं भंते ! समणेणं भगवत्ता उक्खेवओ जाव दस अज्झयणा पं० तं०-‘सिरि हिरि धिति कित्तीओ बुद्धी लच्छी य होइ बोद्धव्वा । इलादेवी सुरादेवी रस (प्र० सह) देवी गंधदेवी य ॥४॥ जइ णं भंते ! समणेणं भगवया जाव संपत्तेणं उवंगाणं चउत्थस्स वग्गस्स पुप्फचूलाणं दस अज्झयणा पं० पढमस्स णं भंते ! उक्खेवओ, एवं खलु जंबू ! तेणं कालेणं० रायगिहे नगरे गुणसिलए चेइए सेणिए राया सामी समोसढे, परिसा निग्गया, तेणं कालेणं० सिरिदेवी सोहम्मो कप्पे सिरिवडिंसए विमाणे सभाए सुहम्माए सिरिंसि सीहासणंसि चउहिं सामाणियसाहस्सीहिं चउहिं महत्तरियाहिं सपरिवाराहिं जहा बहुपुत्तिया जाव नट्टविहिं उवदंसित्ता पडिगता, नवरं दारियाओ नत्थि, पुव्वभवपुच्छा, एवं खलु जंबू ! तेणं कालेणं० रायगिहे नगरे गुणसिलए चेइए जियसत्तू राया, तत्थ णं रायगिहे नयरे सुदंसणे नामं गाहावई परिवसति अइडे०, तस्स णं सुदंसणस्स गाहावइस्स पिया नामं भारिया होत्था सोमाला०, तस्स णं सुदंसणस्स गाहावइस्स धूया पियाए गाहावतिणीए अत्तिया भूया नामं दारिया होत्था वड्डा वड्डकुमारी जुण्णा जुण्णकुमारी पडितपुतत्थणी वरगपरिवज्जिया यावि होत्था. तेणं कालेणं० पासे अरहा पुरिसादाणीए जाव नवरयणीए वण्णओ सो चेव, समोसरणं, परिसा निग्गया, तते णं सा भूया दारिया इमीसे कहाए लब्धट्ठा समाणी हट्टुट्ठा जेणेव अम्मापियरो तेणेव उवा० एवं वदासी-एवं खलु अम्मताओ ! पासे अरहा पुरिसादाणीए पुव्वाणुपुव्विं चरमाणे जाव देवगणपरिवुडे विहरति, तं इच्छामि णं अम्मयाओ ! तुब्भेहिं अब्भणुण्णाया समाणी पासस्स अरहओ पुरिसादाणीयस्स पायवंदिया गमित्तए, अहासुहं देवाणुप्पिया ! मा पडिबंधं०, तते णं सा भूया दारिया ण्हाया जाव सरीरा चेडीचक्कवालपरिकिण्णा साओ गिहाओ पडिनिक्खमति ता जेणेव बाहिरिया उवट्ठाणसाला तेणेव उवा० ता धम्मियं जाणप्पवरं दुरूढा, तते णं सा भूया दारिया नियपरिवारपरिवुडा रायगिहं नगरं मज्झिमज्झेणं निग्गच्छति ता जेणेव गुणसिलए चेइए तेणेव उवा० ता छत्तादीए तित्थकरातिसए पासति, धम्मियाओ जाणप्पवराओ पच्चोरुभित्ता चेडीचक्कवालपरिकिण्णा जेणेव पासे अरहा पुरिसादाणीए तेणेव उवा० ता तिक्खुत्तो जाव पज्जुवासति, तते णं पासे अरहा पुरिसादाणीए भूयाए दारियाए तीसे य महइ० धम्मकहा धम्मं सोच्चा णिसम्म हट्टु० वंदति ता एवं वदासी-सद्दहामि णं भंते ! निग्गंथं पावयणं जाव अब्भुट्ठेमि णं भंते ! निग्गंथं पावयणं से जहेतं तुब्भे वदहं जं नवरं देवाणुप्पिया ! अम्मापियरो आपुच्छामि तते णं अहं जाव पव्वइत्तए, अहासुहं देवाणुप्पिया ! मा पडि०, तते णं सा भूया दारिया तमेव धम्मियं जाणप्पवरं जाव दुरूहति ता जेणेव रायगिहे नगरे तेणेव उवागता रायगिहं नगरं मज्झिमज्झेणं जेणेव सए गिहे तेणेव उवागता रहाओ पच्चोरुहित्ता जेणेव अम्मापितरो तेणेव उवागता, करतल० जहा जमाली आपुच्छति, अहासुहं देवाणुप्पिए !०, तते णं से सुदंसणे गाहावई विउलं असणं० उवक्खडावेति, मित्तनाति० आमंतेति ता जाव जिमियभुत्ततरकाले सुईभूते मित्तणाइसमणितो कोडुंबियपुरिसे सद्दावेति ता एवं वदासी-खिप्पामेव भो देवाणुप्पिया ! भूयाए दारियाए पुरिससहस्सवाहिणीयं सीयं उवट्टवेह जाव पच्चप्पिणह. तते णं ते जाव पच्चप्पिणंति, तते णं से सुदंसणे गाहावई भूयं दारियं ण्हायं जाव विभूसियसरीरं पुरिससहस्सवाहिणिं सीयं दुरूहेति ता मित्तनाति जाव रवेणं रायगिहं नगरं मज्झिमज्झेणं निग्गच्छइ ता जेणेव गुणसिलए चेइए तेणेव उवागते छत्ताईए तित्थयरातिसए पासति ता सीयं ठावेति ता भूयं दारियं सीयाओ पच्चोरुभेति ता तते णं तं भूयं दारियं अम्मापियरो पुरतो काउं जेणेव पासे अरहा पुरिसादाणीए तेणेव उवागते, तिक्खुत्तो वंदति नमंसति ता एवं वदासी-एवं खलु देवाणुप्पिया ! भूया दारिया अम्हं एगा धूया इट्ठा०, एस णं देवाणुप्पिया ! संसारभउव्विग्गा भीया जाव देवाणुप्पियाणं अंतिए मुंडा जाव पव्वयाति, तं एयं णं देवाणुप्पियाणं सिस्सिणीभिकखं दलयेमुत्ति, पडिच्छंतु णं देवाणुप्पिया ! सिस्सिणीभिकखं, अहासुहं देवाणु०, तते णं सा भूया दारिया पासेणं अरहया० एवं वुत्ता समाणी हट्टा उत्तरपुरच्छिमं० सयमेव आभरणमल्लालंकारं उम्भुयइ जहा देवाणंदा पुप्फचूलाणं अंतिए जाव गुत्तबंभयारिणी, तते णं सा भूया अज्जा अण्णदा कदाइ सरीरबाउसिया जाया यावि होत्था अभिक्खणं २ हत्थे धोवति एवं सीसं धोवति मुहं धोवति थणगंतराई धोवति कक्खंतराई धोवति गुज्झंतराई धोवति जत्थ २ विय णं ठाणं वा सिज्जं वा निसीहियं वा चेतेति तत्थ २ विय णं पुव्वामेव पाणएणं अब्भुक्खेति ततो पच्छा ठाणं वा सिज्जं वा निसीहियं वा चेतेति, तते णं तातो पुप्फचूलातो अज्जातो भूयं अज्जं एवं वदासी अम्हे णं देवाणुप्पिए ! समणीओ

निगंथीओ ईरियासमियाओ जाव गुत्तबंभचारिणीओ, नो खलु कप्पति अम्हं सरीरबाउसियाणं होत्तए, तुमं च णं देवाणुप्पिए ! सरीरबाउसिया अभिक्खणं २ हत्थे धोवसि जाव निसीहियं चेतेसि, तं णं तुमं देवाणुप्पिए ! एयस्स ठाणस्स आलोएहिं०, सेसं जहा सुभद्दाए जाव पाडियक्कं उवस्सयं उवसंपज्जित्ताणं विहरति, तते णं सा भूता अज्जा अणोहट्ठिया अणिवारिया सच्छंदमई अभिक्खणं २ हत्थे धोवति जाव चेतेति, तते णं सा भूया अज्जा बहूहिं चउत्थछट्ठ० बहूइं वासाइं सामण्णपरियागं पाउणित्ता तस्स ठाणस्स अणालोइयपडिक्कंता कालमासे कालं किच्चा सोहम्मे कप्पे सिरिवडिंसए विमाणे उववायसभाए देवसयणिज्जंसि जाव ओगाहणाए सिरिदेवित्ताए उववण्णा पंचविहाए पज्जत्तीए पज्जत्ता, एवं खलु गो० ! सिरीए देवीए एसा दिव्वा देविड्ढी लद्धा पत्ता०, ठिई एगं पलिओवमं, सिरी णं भंते ! देवी जाव कहिं गच्छिहिति० ?, महाविदेहे वासे सिज्झिहिति०, एवं खलु जंबू ! निक्खेवओ, एवं सेसाणवि नवणं भाणियव्वं, सरिसनामा विमाणा कप्पे, पुव्वभवे नगरचेइयपियमादीणं अप्पणो य नामादी जहा संगहणीए, सव्वा पासस्स अंतिए निक्खंता तातो पुप्फचूलाणं सिस्सिणीयातो सरीरबाउसियाओ सव्वाओ अणंतरं चइत्ता महाविदेहे वासे सिज्झिहिति । २९॥ पुप्फचूलियाओ समत्ताओ चउत्थो वग्गो ११॥ श्री वण्हिदशोवांगं जइ णं भंते !० उक्खेवओ, उवंगाणं चउत्थस्स वग्गस्स पुप्फचूलाणं अयमट्ठे पं० पंचमस्स णं भंते ! वग्गस्स उवंगाणं वण्हिदसाणं समणेणं भगवया जाव संपत्तेणं के अट्ठे पं० ?, एवं खलु जंबू ! जाव दुवालस अज्झयणा पं० तं०- 'निसडे माअनि वह वहे पगता जुत्ती दसरह दढरहे य । धणू महाघणू सत्तधणू नामे सयधणू य ॥५॥ जइ णं भंते ! समणेणं जाव दुवालस अज्झयणा पं० पढमस्स णं भंते ! उक्खेवओ, एवं खलु जंबू ! तेणं कालेणं० बारवई नामं नगरी होत्था दुवालसजोयणायामा जाव पच्चक्खं देवलोयभूया उत्तरपुरच्छिमे दिसीभाए एत्थ णं रेवयए नामं पव्वए होत्था, तुंगे गगणतलमणुलिहंतसिहरे नाणाविहरूक्खगुच्छगुम्मलतावल्लीपरिगताभिरामे हंसमियमयूरकोंचसारसकागमयणसालकोइलकुलोववेते तडकडगवियरउज्झरपवालसिहरपउरे अच्छरगणदेवसंघविज्जाहरमिहुणसंनिचिन्ने निच्चत्थणए दसारवरवीरपुरिसतेलोकबलवगाणं सोमे सुभए पियदंसणे सुरूवे पासादीए जाव पडिखूवे, तस्स णं रेवयगस्स पव्वयस्स अदूरसामंते एत्थ णं नंदणवणे नामं उज्जाणे होत्था सव्वोउयपुप्फ जाव दरिसणिज्जे, तत्थ णं नंदणवणे उज्जाणे सुरप्पियस्स जक्खस्स जक्खायतणे होत्था चिराईए जाव बहुजणो आगम्म अच्चेति सुरप्पियं जक्खाययणं, से णं सुरप्पिए जक्खाययणे एगेणं महता वणसंडणं सव्वओ समंता संपरिकिक्खते जहा पुण्णभद्दे जाव सिलावट्ठते, तत्थ णं बारवईए नयरीए कण्हे नामं वासुदेवे राया होत्था जाव पसासेमाणे विहरति, से णं तत्थ समुद्विजयपामोक्खाणं दसण्हं दसाराणं बलदेवपामोक्खाणं पंचण्हं महावीराणं उग्गसेणपामोक्खाणं सोलसण्हं राइसाहस्सीणं पज्जुण्णपामोक्खाणं अब्बुट्ठाणं कुमारकोडीणं संबपामोक्खाणं सट्ठीए दुदंतसाहस्सीणं वीरसेणपामोक्खाणं एक्कवीसाए वीरसाहस्सीणं रूप्पिणिपामोक्खाणं सोलसण्हं देवीसाहस्सीणं अणंगसेणापामोक्खाणं अणेगाणं गणियासाहस्सीणं अण्णेसिं च बहूणं राईसरजावसत्थवाहप्पभिईणं वेयड्ढगिरिसागरमेरागस्स दाहिणड्ढभरहस्स आहेवच्चं जाव विहरति, तत्थ णं बारवईए नयरीए बलदेवे नामं राया होत्था महया जाव रज्जं पसासेमाणे विहरति, तस्स णं बलदेवस्स रण्णो रेवई नामं देवी होत्था सोमाला जाव विहरति, तते णं सा रेवती देवी अण्णदा कदाई तंसिं तारिसगंसि सयणिज्जंसि जाव सीहं सुमिणं पासित्ता पडिबुद्धा, एवं सुमिणदंसणपरिकहणं, कलातो जहा महाबलस्स, पनासतो दातो पण्णसरायकण्णगाणं एगदिवसेणं पाणिं० नवरं निसडे नामं जाव उप्पिं पासादे विहरति, तेणं कालेणं० अरहा अरिट्ठनेमी आदिकरे दसधणूइं वण्णतो जाव समोसरिते, परिसा निगया, तते णं से कण्हे वासुदेवे इमीसे कहाए लद्धट्ठे समाणे हट्ठतुट्ठ० एत्तो य कुडुंबियपुरिसे सद्दावेति ता एवं वदासी- खिप्पामेव भो देवाणुप्पिया ! सभाए सुहम्माए सामुदाणियं भेरिं तालेहिं, तते णं ते कुडुंबियपुरिसा जाव पडिसुणित्ता जेणेव सभाए सुहम्माए सामुदाणिया भेरी तेणेव उवा० ता तं सामुदाणियं भेरिं महता २ सद्देणं तालेति, तते णं तीसे सामुदाणियाए भेरीए महता २ सद्देणं तालियाए समाणीए समुद्विजयपामोक्खण दसदसारा देवीओ जाव अणंगसेणापामोक्खा अणेगगणियासाहस्सीणं अन्ने य बहवे राईसर जाव सत्थवाहप्पभितितो ण्हाया जाव पायच्छित्ता सव्वालंकारविभूसिया जहाविभवइड्डिसक्कारसमुदएणं अप्पेगइया हयगया जाव पुरिसवग्गुरापरिकिक्खत्ता जेणेव कण्हे वासुदेवे तेणेव उवा० ता करतल० कण्हं वासुदेवं जएणं विजएणं

वद्धावेति, तते णं से कण्हे वासुदेवे कोडुंबियपुरिसे सद्दावेइ ता एवं वयासी-खिप्पामेव भो देवाणुप्पिया ! आभिसेक्कं हत्थिरयणं पडिकप्पेह ह्यगयरहपवर जाव पच्चप्पिणंति, तते णं से कण्हे वासुदेवे० मज्जणघरे जाव दुरूढे अट्ठमंगलग्गा जहा कूणिणं सेयवरचामरेहिं उद्धवमाणेहिं समुद्विजयपामोक्खेहिं दसहिं दसारेहिं जाव सत्थवाहप्पभित्तीहिं सद्धिं संपरिवुडे सव्विड्डीए जाव रवेणं बारवइं नगरी मज्झिमज्झेणं जहा कूणिओ जाव पज्जुवासइ, तते णं तस्स निसदस्स कुमारस्स उप्पिं पासायवरगयस्स तं महता जणसद्धं च जहा जमाली जाव धम्मं सोच्चा निसम्म वंदइ नमंसइ ता एवं वदासी-सद्दहामि णं भंते ! निग्गंथं पावयणं जहा चित्तो जाव सावगधम्मं पडिवज्जति ता पडिगते, तेणं कालेणं० अरहओ अरिद्विनेमिस्स अंतेवासी वरदत्ते नामं अणगारे उराले जाव विहरति, तते णं से वरदत्ते अणगारे निसदं कुमारं पासति ता जातसद्धे जाव पज्जुवासमाणे एवं वयासी-अहो णं भंते ! निसदे कुमारे इट्ठे इट्ठरूवे कंते कंतरूवे एवं पिए मणुन्ने मणामे मणामरूवे सोमे सोमरूवे पियदंसणे सुरूवे, निसदे णं भंते ! कुमारेणं अयमेयारूवा माणुयइड्डी किणा लद्धा किणा पत्ता पुच्छा जहा सूरियाभस्स एवं खलु वरदत्ता ! तेणं कालेणं० इहेव जंबुदीवे भारहे वासे रोहीडए नामं नगरे होत्था रिद्धथिमियसमिद्धा महवत्ते उज्जाणे मणिदत्तस्स जक्खस्स जक्खाययणे, तत्थ णं रोहीडए नगरे महब्बले नामं राया, पउमावई नामं देवी, अन्नया कदाइ तंसि तारिसगंसि सयणिज्जंसि सीहं सुमिणे एवं जम्मणं भाणियव्वं जहा महाबलस्स नवरं वीरंगतो नामं बत्तीसतो दातो बत्तीसाए रायवरकन्नगाणं पाणिं जाव ओगिज्जमाणे २ पाउसवरिसारत्तसरयहेमंतगिम्हवसंतं छप्पिं उऊ जहाविभवं संमाणेइ ता इट्ठे सद्द जाव विहरति, तेणं कालेणं० सिद्धत्था नाम आयरिया जातिसंपन्ना जहा केसी नवरं बहुस्सुया बहुपरिवारा जेणेव रोहीडए नगरे जेणेव मेहवत्ते उज्जाणे जेणेव मणिदत्तस्स जक्खस्स जक्खाययणे तेणेव उवागते, अहापडिरूवं जाव विहरति, परिसा निग्गया, तते णं तस्स वीरंगतस्स महता जणसद्धं च जहा जमाली निग्गतो धम्मं सोच्चा जं नवरं देवाणुप्पिया ! अम्मापियरो आपुच्छामि जहा जमाली निक्खंतो जाव अणगारे जाते जाव गुत्तबंभयारी, तते णं से वीरंगते अणगारे सिद्धत्थाणं आयरियाणं अंतिए सामाइयमादियाइं जाव एक्कारस अंगाइं अहिज्जति ता बहूइं जाव चउत्थ जाव अप्पाणं भावेमाणे बहुपडिपुण्णाइं पणयालीसवासाइं सामन्नपरियायं पाउणित्ता दोमासियाए संलेहणाए अत्ताणं झूसित्ता सवीसं भत्तसयं अणसणाए छेदित्ता आलोइय० समाहिपत्ते कालमासे कालं किच्चा बंभलोए कप्पे मणोरमे विमाणे देवत्ताए उववन्ने, तत्थ णं अत्थेगइयाणं देवाणं दस सागरोवमाइं ठिई, तत्थ णं वीरंगयस्स देवस्स दस सागरोवमाइं ठिई पं०, से णं वीरंगते देवे तातो देवलोगाओ आउक्खएणं जाव अणंतरं चयं चइत्ता इहेव बारवईए नयरीए बलदेवस्स रत्तो रेवईए देवीए कुच्छिंसि पुत्तत्ताए उववन्ने, तते णं सा रेवती देवी तंसि तारिसगंसि सयणिज्जंसि सुमिणदंसणं जाव उप्पिं पासायवरगते विहरति, तं एवं खलु वरदत्ता ! निसदेणं कुमारेणं अयमेयारूवा ओराला मणुयइड्डी लद्धा०, पभू णं भंते ! निसदे कुमारे देवाणुप्पियाणं अंतिए जाव पव्वइत्तए ?, हंता पभू, सेवं भंते ! सेवं भंते ! इइ वरदत्ते अणगारे जाव अप्पाणं भावेमाणे विहरति, तते णं अरहा अरिद्विनेमी अण्णदा कदाइ बारवतीओ नगरीओ जाव बहिया जणवयविहारं विहरति, निसदे कुमारे समणोवासए जाए अभिगतजीवाजीवे जाव विहरति, तते णं से निसदे कुमारे अण्णया कयाइ जेणेव पोसहसाला तेणेव उवा० ता जाव दब्भसंथारोवगते विहरति, तते णं तस्स निसदस्स कुमारस्स पुव्वरत्तावरत्त० धम्मजागरियं जागरमाणस्स इमेयारूवे अज्झत्थिए०-धन्ना णं ते गामागरजावसंनिवेसा जत्थ णं अरहा अरिद्विनेमी विहरति, धन्ना णं ते राईसरजावसत्थवाहप्पभित्तिओ जे णं अरिद्विनेमिं वंदति नमंसति जाव पज्जुवासति, जति णं अरहा अरिद्विनेमी पुव्वाणुपुव्विं० नंदणवणे विहरेज्जा तेणं अहं अरहं अरिद्विनेमिं वंदिज्जा जाव पज्जुवासिज्जा, तते णं अरहा अरिद्विनेमी निसदस्स कुमारस्स अयमेयारूवं अज्झत्थियं जाव वियाणित्ता अट्ठारसहिं समणसहस्सेहिं जाव नंदणवणे उज्जाणे०, परिसा निग्गया, तते णं निसदे कुमारे इमीसे कहाए लद्धे समणे हट्ठ० चाउग्घंटेणं आसरहेणं निग्गते जहा जमाली जाव अम्मापियरो आपुच्छित्ता पव्वयिते अणगारे जाव गुत्तबंभयारी, तते णं से निसदे अणगारे अरहतो अरिद्विनेमिस्स तहारूवाणं थेराणं अंतिए सामाइयमाइयाइं एक्कारस अंगाइं अहिज्जति ता बहूइं चउत्थछट्ठ जाव विचित्तेहिं तवोक्कमेहिं अप्पाणं भावेमाणे बहुपडिपुण्णाइं नव वासाइं सामण्णपरियागं पाउणति ता बायालीसं भत्ताइं अणसणाए छेदेति ता आलोइयपडिक्कंते समाहिपत्ते आणुपव्वीए कालगते, तते णं से वरदत्ते अणगारे निसदं

अणगारं कालगतं जाणित्ता जेणेव अरहा अरिदुनेमी तेणेव उवा० ता जाव एवं वयासी-एवं खलु देवाणुप्पियाणं अंतेवासी निसढे नामं अणगारे पगतिभद्दए जाव विणीए, से णं भंते ! निसढे अणगारे कालमासे कालं किच्चा कहिं गते० ?, वरदत्तादि ! अरहा अरिदुनेमी वरदत्तं अणगारं एवं वयासी-एवं खलु वरदत्ता ! ममं अंतेवासी निसढे नामं अणगारे पगभद्द जाव विणीए ममं तहारूवाणं थेराणं अंतिए सामाइयमाइयाइं एक्कारस अंगाइं अहिज्जित्ता बहुपडिपुण्णाइं नव वासाइं सामण्णपरियागं पाउणित्ता बायालीसं भत्ताइं अणसणाए छेदेत्ता आलोइयपडिक्कंते समाहिपत्ते कालमासे कालं किच्चा उड्ढं चंदिमसूरियगहनक्खत्ततारारूवाणं सोहम्मीसाणजावअचुते तिण्णि य अट्टारसुत्तरे गेविज्जविमाणावाससते वीतीवत्तित्ता सव्वट्ठसिद्धविमाणे देवत्ताए उववण्णे, तत्थ णं देवाणं तेत्तीसं सागरोवमाइं ठिई पं०, से णं भंते ! निसढे देवे तातो देवलोगाओ आउक्खएणं जाव अणंतरं चयं चइत्ता कहिं गच्छिहिति० ?, वरदत्ता ! इहेव जंबुद्दीवे महाविदेहे वासे उन्नाते नगरे विसुद्धपिइवंसे रायकुले पुत्तत्ताए पच्चायाहिति, तते णं से उम्मुक्कबालभावे विण्णयपरिणयमित्ते जोव्वणगमणुप्पत्ते तहारूवाणं थेराणं अंतिए केवलबोहिं बुज्झित्ता अगाराओ अणगारियं पव्वज्जिहिति, से णं तत्थ अणगारे भविस्सति ईरियासमिते जाव गुत्तबंभयारी, से णं तत्थ बहूहिं चउत्थछट्ठदुमदसमदुवालसेहिं मासद्धमासखमणेहिं विचित्तेहिं तवोकम्मेहिं अप्पाणं भावेमाणे बहूइं वासाइं सामण्णपरियागं पाउणिस्सति ता मासियाए संलेहणाए अत्ताए झूसिहिति ता सट्ठिं भत्ताइं अणसणाए छेदिहिति ता जस्सट्ठाए कीरति णग्गभावे मुंडभावे अण्हाणए जाव अदंतवणए अच्छत्तए अणोवाहणए फलहसेज्जा कट्ठसेज्जा केसलोए बंभचेरवासे परघरपवेसे पिंडवायलद्धावलद्धे उच्चावया य गामकंटया अहियासिज्झंति तमट्ठं आराहेति ता चरिमेहिं उस्सासनिस्सासेहिं सिज्झिहिति जाव सव्वदुक्खाणं अंतं काहिति, एवं खलु जंबू ! समणेणं भगवया महा० जाव निक्खेवओ, इइ निसढज्झयणं १, एवं सेसावि एक्कारस अज्झयणा नेयव्वा संगहणीअणुसारेण अहीणमइरित्ता एक्कारससुवि । ३०॥२-१२ वण्हिदसा पंचमो वग्गो १२ ॥ निरयावलियासुयखंधो समत्तो, समत्ताणि उवंगाणि, निरयावलियाउवंगे णं एगो सुयखंधो पंच वग्गा पंचसु दिवसेसु उद्दिस्संति, तत्थ चउसु दस २ उद्देसगा पंचमवग्गे बारस उद्देससगा । ५५५३१। श्री निरयावलिलकाद्युपांगपञ्चकं ८-१२ ॥ श्रीसिद्धाद्रितलहट्टिकागतशिलोत्कीर्णसकलागमोपेतश्रीवर्धमानजैनेगममंदिरे शिलायामुत्कीर्ण वीरस्य २४६८ ॥ ५५५